

Carta nu cuítí naçahyí Pablo nuú na cúú cuéntá Jesús ndúu ñuu Corinto

Cáhan Ndióxi Pablo xihín na cúú cuéntá Jesús ndúu ñuu Corinto

¹ Yehe cúú Pablo, da naçaxi Ndióxi cacuu apóstol cuéntá Jesucristo jáchi já cúní a caja. Yehe xihín ñaní Sóstenes

² chindahá nde Ndióxi coo ndó, na cúú cuéntá Jesús ndúu ñuu Corinto jan jáchi in cúú ndó xihín Jesucristo. Mé Ndióxi naçaxi a ndohó cacuu ndó ñayivi yí, na nandiquiahva mé ná ndáha mé á. Ta quiahva já naçaxi ri a java ga na ndúu ndijáa ñuu cacuu na cuéntá mé á, na cája cáhnu Jesucristo, xitoho í jáchi cúú ri a xitoho mé ná.

³ Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

Ñamaní cája Ndióxi xoho sahá ña cándéé ini Jesucristo

⁴ Níí tiempo ndíquiahva i ndixahvi nu Ndióxi jáchi naçaja mé á cuahá ñamaní xihín ndo sahá ña cándéé ini ndó Jesucristo.

⁵ Ta sahá ña in nanduu ndó xihín mé á sahá ña cán queá naçaja Ndióxi cuahá ñamaní xihín ndo já ná cuu çahan vaha ndó saha mé á. Ta já nasuná a xíní túní ndo já ná candaã vaha ini ndó saha mé á.

6 Ta ña ñacachi i xihín ndó sahá Jesucristo ñaxinu a ini ndó ta viti cája ndó ña cúni mé á caja ndó.

7 Ta viti nani ndáti ndó quiví quixi tucu Jesucristo, xitoho í ñuyiví yóho ni in túhún toho ñaha a ndímani nu ndo ña ná caja ndó ña cúni Ndióxi jáchi ñasahan mé á tóco ndihi ñaha nu ndo.

8 Mé Ndióxi chindeé a ndohó já ná caca tuun ndó ichi cuéntá mé á janda quiví nu ndíhi. Ta já ná a cúu chícaan ñayivi cuachi jata ndo tá ná xinu coo quiví quixi tucu Jesucristo, xitoho í ñuyiví yóho.

9 Jáchi cája tá cája Ndióxi ña sáhan mé á tuhun a caja. Ta mé á quea ñacaxi a mí ña ná in cacuú xihín Jesucristo, xitoho í ña cúu in túhún jini já jahyi mé á.

Tává xoo java ña cúu cuéntá Jesús mé ná

10 Candehé ndo, ñani mí i, ña cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan víi tuhun ndihi ndó ta a cáhnda táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jini ndihi ndó.

11 Candehé ndo, ñani mí i, ña cúu cuéntá Jesús. Cáhan i ña yóho xihín ndo jáchi ñacaxi tuhun ña vehe Cloé xihín i ña ndaja mé ndó cáni táhan ndó.

12 Jáchi ñañehé e tuhun ña java ndó cáchi ndo ña cúu ndó cuéntá yehe, da cúu Pablo. Ta java ndó cáchi ndo ña cúu ndó cuéntá Apolos. Ta java ndó cáchi ndo cúu ndó cuéntá Pedro. Ta java ndó cáchi ndo cúu ndó cuéntá Jesucristo.

13 Ta xihín ña yóho ña cája ndó quea sáhnda java táhan ndó. Candehé ndo. Coo ñaxihi i, da cúu Pablo

ndica crúxu saha ndo já ná jáçacu u ndohó. Ta ni coó naçandúta ndó cuéntá mí i.

¹⁴ Ndixahvi Ndióxi coó najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihin Gayo cuití va.

¹⁵ Ña cán quéa ni in túhún ndó a cúu cachi ndó ña naçandúta ndó cuéntá mí i jáchi coó najácandúta toho i ndohó.

¹⁶ Ta ndíçuhun ini i ña najácandúta ri na vehe Estéfanos. Na yóho cuití cúu na ñúhu ini i najácandúta i.

¹⁷ Jáchi coó nachindahá toho Jesucristo yehe ña ná caca nuu i jácandúta i ñayivi. Nachindahá mé á yehe ña ná caca nuu i çahan i tuhun vaha saha mé á xihin ñayivi já ná cuu çacu ndaa ínima ná. Ta coó toho tuhun ndíchí çahan i xihin ná jáchi co cúni jánuu ndáha i xihin tuhun çahan i yóho tóco ndihi ña naçaja Jesucristo tá naçihí a ndica crúxu saha yo.

Ndíchí jini Jesucristo ta in ndée mé á quíxi nu Ndióxi

¹⁸ Ñayivi, na xíca çahan ndihi saha ná ini in-dayá, mé na cán çahán na ña cúu yó na taçhi tá çahan yó ña naçihí Jesucristo ndica crúxu já ná çacu ndaa ínima ná. Joo nu mí, na nasacu ini Ndióxi jáçacu a cávatá yo cándaá ini ña xihin ndée Ndióxi naçinu tuhun mé á nu yo.

¹⁹ Já cáhí tuhun Ndióxi já:

Jándihi i sahá ña ndíchí jini ñayivi ñuyívi,
ta a quéhe e cuéntá sahá ña cándaá ini ñayivi, já
naçahyi a nuú tuhun Ndióxi.

20 Sahá ña cán quéa coó saha toho ñaha ñuyíví yóho nu Ndióxi vatí da ndíchí jini xihín da tácu ini cáhán da ña cúú dá da ndíchí ndivaha sahá ña xini da cahan da sahá ñaha ñuyíví yóho. Joo nacaja Ndióxi ña ná cacuu a ña coó saha.

21 Sahá ña ndíchí jini Ndióxi, co cúni mé á ña ná cuu candaa ini ñayivi saha mé á xihín ña ndíchí quixi jini ñayivi ñuyíví. Ña nacaja mé á quéa nachindahá a java ñayivi ña ná cahan na tuhun vaha saha mé á já quéa ndá na cándusa ña ta cándéé ini na Ndióxi já cuu cacu ndaa ínimá ná. Ta ña yóho cúú á in ña tachi ndivaha nuú ñayivi ñuyíví.

22 Jáchi ñayivi Israel cáchí na ña ndúsa cuni na ña xitúhún ndivaha já cuu candúsa na tuhun vaha saha Jesús. Ta na tóho, na ñuu Grecia cúni na ña ná cahan ndíchí ndivaha ñayivi xihin ná já cuu candúsa na ña.

23 Joo mé nde xíca nuu nde cáxi tuhun nde nuú ñayivi sahá Jesucristo, mé a naxihí ndica crúxu sahá ñayivi. Joo tá xini johó na Israel ña yóho já ndíhíhvi na. Ta tá xini johó na tóho ña yóho já cáhán na ña cúú á ña tóntó ndivaha.

24 Joo tóco ndihi na nacaxi Ndióxi cacuu na cuénta mé á, á cúú ná na tóho á cúú ná na Israel, cándaa ini na ña cahan nde sahá Jesucristo, ña ín ndéé mé á jácacu a ñayivi. Ta xini vaha na ña ndíchí ndivaha jini mé á nacaja Ndióxi.

25 Nuú ñayivi ñuyíví ña cája Ndióxi cúú á ña tóntó ndivaha. Joo ña cája Ndióxi cúú á ña ndíchí chága nu ndíhi ñaha cája ñayivi ñuyíví. Ta vatí cáchí ñayivi ña co ndiyahvi ña naxihí Jesucristo ndica crúxu joo yahvi chága ña yóho a juú ga inga ñaha cuu caja ñayivi.

26 Candehé ndo, ñani i, na cúu cuéntá Jesús. Naçaxi Ndióxi ndohó cacuu ndó cuéntá mé á vatí chá cuití ndó cúu ndó na ndíchí jini nuú ñayivi ñuyívi. Ta chá ndó cúu ndó na náhnu nuú ñayivi ta chá cuití ndo cúu ndó na cuicá.

27 Joo naçaxi Ndióxi ñayivi, na cáchi ñayivi ñuyívi cúu ná na tóntó jini já queá ná cacahan nuú na ndíchí jini. Mé Ndióxi naçaxi a ñayivi vitá ná cacuu na cuéntá mé á já ná cacahan nuú na náhnu ndúu ñuyívi yóho.

28 Ñayivi, na coó saha ñuyívi yóho, na quéhe núu ñayivi saha, na cán cúu na naçaxi Ndióxi. Ta naçaxi a na co ndáyahvi toho ñuyívi yóho ña ná nuu ndáha na náhnu cuéntá ñuyívi yóho.

29 Ta xihín ña yóho cándaá ini ñayivi ña a cúu ndiñehe jícó na mé ná nu Ndióxi.

30 Mé Ndióxi queá naçaja ña ná in nduú xihín Jesucristo. Ta naçaja mé á ña ná ndindíchí jini yo. Ta naçaja mé á ña ná canduu ndaa yó nu Ndióxi. Naçaja mé á ña ná nduú ñayivi yii, na cúu cuéntá mé á. Ta mé á najáçacu a mí nuú cuachí.

31 Ta já cáchi tuhun Ndióxi já: “Ndá na cuni caja lánda, xini ñuhú caja lánda na sahá ña náhnu naçaja Ndióxi saha ná.”

2

Cáxi tuhun Pablo ña naxihi Jesucristo ndica crúxu sahá cuachi ñayivi

1 Candehé ndó, ñani i, na cúu cuéntá Jesús. Tá naçahan i naçahan i ña ndaa cuéntá Ndióxi nu ndo, coó naçahan i ña xihín tuhun ndíchí ñuyívi yóho.

² Joo nasacu ini i cahan i sahá Jesucristo cuití va tañu ndó, mé a naxihí ndica crúxu.

³ Tá nasahiin i tañu ndó, coó nandiñehe jícó i mí i. Ña nacaja i quea yíhví yíhví cúu u anda quíji nīnu i.

⁴ Ta tá nacasáhá i cáxi tuhun i tuhun vaha sahá Jesucristo nu ndo, coó toho tuhun ndíchí nacahan i xihin ndo ña ná cava i jini ndó xihin á, vaha. Ña nacaja i quea nacahan i xihin ndo xihin ndée ínimā yīi Ndióxi ta mé a najáxinu a ini ndó xihin ndée mé á.

⁵ Já quea ná candaā ini ndó ña Ndióxi quea cája ña ná candeé ini ndó mé á xihin ndée mé á. Ta co cúu á sahá ña ndíchí quíxi jini ñayivi ñuyiví yóho.

Ínimā yīi Ndióxi cája ña ná candaā ini ñayivi saha mé á

⁶ Joo tá ndítuhún nde xihín na sa candaā vaha ini ñaha Ndióxi já cahan nde tuhun ndíchí xihín ná. Joo co cahan nde tátuhun cahan ta ndíchí ndúu ñuyiví yóho. Ta ni co cúu á tátuhun ña cahan da ndíchí, da cómí cuéntá sahá ñuyiví yóho. Jáchi yachi ndihi sahá na cán.

⁷ Ña cahan nde cúu á ña ndíchí cuéntá Ndióxi. Ta cúu á ña nasahiin jehé, ña co xini ñayivi saha janda tá camani cava sahá saha ñuyiví. Jáchi janda mé tiempo já nasacu ini Ndióxi ndá quiahva caja jácaacu a mí anda ama caa quivi.

⁸ Ta ni in túhún na náhnu cómí cuéntá sahá ñuyiví yóho co candaā ini na ña nasacu ini Ndióxi jácaacu a mí. Jáchi tá ná candúsa na ña já quea a cáta caa toho na Jesucristo, xitoho í ndica crúxu, nduu. Jáchi mé Jesucristo cúu á ña cáhnu ndivaha.

⁹ Ta já cáchí t̄uhun Ndióxi já:
 Ni in t̄uhún ñ̄ayivi a ñ̄aha cuni na ta a ñ̄aha cuni
 j̄oho na,
 ta ni a ñ̄aha cahvi ini na,
 ndá quiahva ín ñ̄a náhnu sácú ini Ndióxi quiahva
 nuú ñ̄ayivi tá quíhvi ini na mé á, cáchí t̄uhun
 Ndióxi.

¹⁰ N̄acaja ínima ȳii Ndióxi ñ̄a ná candāa iní tóco
 ndihi ñ̄a yóho. Jáchi ínima ȳii mé á s̄andehé a tóco
 ndihi ñ̄aha ta x̄ín̄i a j̄anda ñ̄a cáhvi ini mé Ndióxi.

¹¹ Ni in t̄uhún ñ̄ayivi c̄o x̄ín̄i na ñ̄a cáhvi ini inga
 na. Ínima in in na cuití va x̄ín̄i a ñ̄a cáhvi ini in in na.
 Quiahva já ín ri x̄ih̄in Ndióxi va. In t̄uhún ínima ȳii
 mé á x̄ín̄i ndí̄a cáhvi ini a.

¹² N̄asahan Ndióxi ínima ȳii mé á nu ȳo ta c̄o cúu
 á tátuhun ínima ñ̄ayivi ñ̄uyíví. Ta n̄acaja mé á ñ̄a ná
 candāa iní ndaja ín ñ̄a náhnu s̄ahan mé á nu ȳo.

¹³ Ta tá cáhan nde s̄ahá ñ̄a yóho, cáhan nde tá
 quiahva najánaha ínima ȳii Ndióxi nuú nde. Ta c̄o
 cáhan nde ñ̄a x̄ih̄in t̄uhun ndíchí n̄acatiahva nde
 ñ̄uyíví yóho. Quiahva já ndícani nde ñ̄aha Ndióxi
 x̄ih̄in na ñ̄úhu ínima ȳii Ndióxi ini.

¹⁴ Tóco ndihi ñ̄a yóho cúu á ñ̄a tóntó ndivaha nuú
 ñ̄ayivi, na c̄o ñ̄úhu ínima ȳii Ndióxi ini. C̄o ndíquehe
 vaha na ñ̄a ta ni a cuú candāa ini na ndaja ín a jáchi
 na ñ̄úhu ínima ȳii Ndióxi ini, na cán cúu ndusa na
 cándāa ini ñ̄aha Ndióxi.

¹⁵ Joo na ñ̄úhu ínima ȳii Ndióxi ini, na cán cúu na
 cándāa ini ndá ñ̄aha cúu ñ̄a vaha ta ndá ñ̄aha c̄o
 cúu toho ñ̄a vaha. Ta x̄ih̄in ñ̄a yóho c̄atóntó ñ̄ayivi
 ñ̄uyíví jáchi c̄o cándāa ini na ñ̄a cúu cuéntá Ndióxi.

¹⁶ Jáchi cáchí t̄uhun Ndióxi: “Ni in t̄uhún ñ̄ayivi a
 cúu candāa ini na ñ̄a cáhvi ini Ndióxi, xitoho í. Ta ni

in túhún nā a cúu cachi xih̄in mé á ñā ndítahan nu á caja”, cáchí tuhun Ndióxi. Joo mí, nā cúu cuéntá Jesús, cáhvi iní tá quiahva cáhvi ini Jesucristo jáchi ñúhu ínimā ȳii Ndióxi ini mí, nā cúu cuéntá mé á.

3

Nā cája chúun cuéntá Ndióxi

¹ Candehé ndó, ñani i, nā cúu cuéntá Jesús. Coó nācuu cahan̄ i xih̄in ndo tá quiahva cahan̄ i xih̄in nā nāchutú ndaa xih̄in ínimā ȳii Ndióxi. Jáchi mé ndó cúu ndó tátuhun léé loho ñā chíchí jáchi a ñāha cuahnu ndó xih̄in tuhun Ndióxi jáchi cája ndó ñā xíca ini yiquí cuñu ndó caja tá quiahva cája ñayivi ñuyíví.

² Sahá ñā cán quéa tá najánahā i tuhun Ndióxi nu ndo, coó nācuu jánahā i ñā ihvi chága nu ndo jáchi a cúu candaa ini ndó ñā. Ñā nācāja i xih̄in ndo quéa nasahan̄ i tátuhun leche nu ndo jáchi cúu ndó tátuhun nā valí chíchí sahá ñā a cuú cuxu ndó ñāha vee. Ta jandā viti cō iin tiahva ndó jácuaha ndó ñā ihvi chága cuéntá tuhun Ndióxi.

³ Jáchi cúu ȳii va ndó tátuhun ñayivi ñuyíví. Ndaja táhan mé ndó cáhiv̄i ini xih̄in táhan ndó ta cáni táhan ndó ta sáhndá java táhan ndó. Ta xih̄in ñā yóho cája ndó ñā cún̄i mé cuití ndo tá quiahva cája ñayivi ñuyíví.

⁴ Java ndó cáchí ndo ñā cúu ndó cuéntá yehe, da cúu Pablo. Ta java ndó cáchí ndo ñā cúu ndó cuéntá Apolos. Ta xih̄in ñā yóho sáhndá java táhan ndó ta náha ndó ñā cája ndó tá quiahva cája ñayivi ñuyíví.

5 Ndá da cúu Apolos xihín yehe ña ná cani táhan ndó sahá nde. Co ndítahan caja ndó já jáchi mé nde cúu nde da xíca nuu cája chúun cuéntá Jesucristo, xitoho í cuití va. Ta sahá chuun cája nde yóho ñacuu ñacandúsa ndó mé á. Ta ña yóho cúu chuun ñanaha Jesucristo, xitoho í nuú yehe xihín nu Apolos caja nde.

6 Ña ñacaja nde cúu á tátuhun ña cája na tá xútu na. Ta yehe cúu u tátuhun da ñachihin tata jáchi ñacaxi tuhun i tuhun Ndióxi nu ndo. Ta Apolos cúu dá tátuhun da ñaxojo ticuí nuú a cán jáchi ñajánaha chága da tuhun Ndióxi nu ndo. Joo Ndióxi quea ñacaja ña ná cuahnu a jáchi cája mé á ña ná cuu cuahnu ndó xihín tuhun mé á.

7 Sahá ña cán quea vatí yehe cúu u da ñaxutu ta Apolos cúu dá da ñaxojo ticuí joo ni in túhún nde coó saha. Cáhnu cúu Ndióxi jáchi mé á quea ñacaja ña ná cuahnu mé tata ñaxutu nde cán.

8 Xíní ñúhú candaá ini ndó ña in cúu va ña chíhin tata xihín ña xójo ticuí nu á. Ta tá in tá in chuun ñacaja in in ña cán quehe na yahvi saha.

9 Yehe xihín Apolos in cúu nde cája chúun nde cuéntá Ndióxi. Ta mé ndó cúu ndó tátuhun in yójo nuú ñasacu Ndióxi ndehe caja chúun nde cuéntá mé á.

Ta jári cúu ndó tátuhun in vehe ña cávaha Ndióxi.

10 Ta yehe cúu u tátuhun da cávaha mé vehe yóho. Ta mé Ndióxi quea ñasahan ñamaní nuú i ña ná taán i yuu ndúhu sahá ta ná jácava sahá i ña. Ta inga na xíní ñúhú caja chúun xihín á. Joo ndítahan candehe vaha na ndaja caja na chuun yóho.

11 Jáchi in túhún Jesucristo cúu á tátuhun yuu ndúhu sahá vehe yóho. Ta ni in na a cúu tavá xóo

na ña ta já cacu na inga ñaha.

12 Mé na cávaha vehe nuú yuu ndúhu yóho cuu jáxinu na ña xihín jiuhun cuán ta cuu caja na ña xihín jiuhun cúxú ta cuu caja ri na ña xihín yuu ñúchí. Ta jári cuu caja na ña xihín yító ta cuu caja ri na ña xihín xehe ndíyoho ta janda xihín toñámá cuu caja na ña.

13 Joo vaxi quivi quixi tucu Jesucristo coto ndojó mé á chuun ñacaja in in ñayivi cuéntá mé á. Cacu a tátuhun coto ndojó a ña xihín ñuhú cáyi já quéa ná ñaha nu á, á ndihi sahá, á co ndíhi sahá. Ta xihín ña yóho ñaha nu á, á vaha ñacaja chúun ñayivi cuéntá mé á, á a váha toho ñacaja na.

14 Ta tá coó nandíhi sahá ña ñacaja na cán já quéa chahvi Ndióxi na sahá chuun ñacaja na.

15 Joo tá ná cayi ña ñacavaha na cán já ndíhi saha tóco ndíhi chuun ñacaja na vatí mé ná cacu ndaa ínima ná. Ta ña yóho cacuu a tátuhun tá jácacu in dataa mé dá tá quéta da ini in vehe tá cáyi a xihin ñúhu ita.

16 Á co xini ndó ña cúú ndó tátuhun veñuhu Ndióxi tá ndácaan ínima yii mé á ini ínima in in ndó.

17 Ta ndá na ná jándíhi na sahá veñuhu Ndióxi yóho já quéa jándíhi Ndióxi sahá na cán. Jáchi yii ndivaha veñuhu Ndióxi. Ta mé ndó cúú ndó tátuhun veñuhu Ndióxi cáhan i saha jan.

18 Candehé ndo. Ndá ndó cáhan ña cúú ndó na ndíchí jini sahá ña xini ndó ñaha ñuyiví yóho, xini ñuhú candaa ini ndó ña cúú á tátuhun jándahvi ndó mé ndó. Xini ñuhú ndaja ndó mé ndó tátuhun na co xini já quéa ná nuná nu Ndióxi jáñaha nu ndo ndaa cúú ndusa na ndíchí jini.

19 Jáchi ña ndíchí quíxi jini ñayivi ñuyíví cúú á ña tóntó ndivaha nu Ndióxi. Já cáchi tuhun Ndióxi já: “Ña cája mé á quea ná cachihin saha ná xihin ña ndíchí quíxi jini mé va na.”

20 Quiahva já cáchi ri tuhun Ndióxi: “Cándaá cáxi ini Ndióxi ña coó sahá ña cáhvi jini na ndíchí ndúu ñuyíví yóho”, já cáchi tuhun Ndióxi.

21 Sahá ña cán quea ni in túhún ñayivi co ndítahan ndiñehe jícó na mé ná sahá ña tiahva in ñayivi ñuyíví yóho cája na. Xíní ñúhú ndicuhun ini ndó ña nasahan Ndióxi tóco ndihi ñaha nu ndo.

22 Nandiquiahva mé á ndehe, da cúú Pablo xihin Apolos xihin Pedro nu mé ndó já ná cuu jánaha nde tuhun Ndióxi nu ndo. Nasahan mé á ñuyíví yóho nu ndo já ná cuu catacu ndó. Ta nasacu ini mé á quíví quivi ndó ta já tandaa quivi cuhun ndó coo ndó xihin mé á. Tóco ndihi ña yóho nasahan Ndióxi nu ndo.

23 Ta mé ndó cúú ndó cuéntá Jesucristo ta Jesucristo cúú á cuéntá Ndióxi.

4

Ndicani Pablo ndaja in chuun cája na apóstol

1 Co ndítahan toho ndaja cáhnu ndó ndehe. Xíní ñúhú quehe ndó cuéntá ña natahnda chuun nuú nde caja chúun nde cuéntá Jesucristo jánaha nde ña coó nasaxini ñayivi jihna, ña nasacu ini Ndióxi caja.

2 Ta ndá da ndíquehe in chuun, xíní ñúhú nahá da ña mé a ndaa cuu candeé ini na da, ña mé a ndaa caja tá caja da chuun natahnda nu dá caja da.

³ Ta cája i cuéntá ñacaja vaha i chuun ñasahnda Ndióxi nuú i caja i. Sahá ña cán quea co sáhní toho i mí i tá chícaan ndó cuachi jatá i. Ta co ndícani ini i tá java ga ñayivi chícaan na cuachi jatá i. Jáchi cája i cuéntá coó toho cuachi ñacaja i.

⁴ Tá ná cachi i xihín ndo ña coó toho cuachi ñacaja i, co cuni cachi i ña mé a ndaa co ndójo ga i cuachi. Jáchi xíni vaha Jesucristo, xitoho i á ñacaja vaha i á coó ñacaja vaha i.

⁵ Sahá ña cán quea co xíni ñúhú ndihi ini ndó candehé ndaa ndó ñayivi. Xíni ñúhú candati ndó janda quiahva ná quixi Jesucristo caja vií mé á sahá ñayivi já ná ndítivi ña ñúhu ínima in in ñayivi. Ta xihín ña yóho cuni tóco ndihi ñayivi ña cáhvi ini na. Anda jávi ndaja cáhnu Ndióxi na ñacaja vaha.

⁶ Candehé ndo ñani i, na cúu cuéntá Jesús. Sahá ña cuni nde ña ná candaa ini ndó ndía ndítahan caja ndo sahá ña cán quea ndícani i nu ndo saha Apolos xihín saha mí i. Jáchi ín in tuhun ta cáhí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaa ini ndó ña co ndítahan ndiñehe jícó ndo mé ndó sahá ña cúu ndó cuéntá in da jáchi xihín ña yóho jánuu ndáha ndó inga na táhan nde.

⁷ Jáchi ni in ndó co cúu ndó na náhnu chága a juú ga inga na. Xíni ñúhú candaa ini ndó ña tóco ndihi ña cómi ndo cúu á ña ñasahan Ndióxi nu ndo. Sahá ña cán quea co ndítahan caja cáhnu ndó mé ndó sahá ña ñañehe táhvi ndo nu Ndióxi.

⁸ Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó na cuicá joo co cúu á ña ndaa. Ta cáhán ndo cúu ndó na cómi cuéntá sahá ñayivi joo co cúu á ña ndaa. Cája

ndó tátuhun cō xíní ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo.

⁹ Cúú á tátuhun nasacu Ndióxi ndehe, na cúú apóstol janda nu ndíhí. Cúú nde tátuhun na ndícuíta yíco cūhun quivi. Ta jandá joho sándehe ñayivi ñuyíví ndehe ta sácu ndaa na ndehe. Ta janda mé táto Ndióxi sándehe na ndehe cuahan nde.

¹⁰ Sahá ña quíhvi ini nde Jesucristo cúú nde tátuhun ñayivi tóntó ndivaha nuú ñayivi ñuyíví. Joo mé ndó nandaja ndó mé ndó tátuhun na xíní ndivaha saha mé á. Mé nde cúú nde tátuhun ñayivi vitá nuú ñayivi ñuyíví joo cája ndó tátuhun na ndacú ini. Ndája cáhnu ñayivi ñuyíví mé ndó nani quéhe núu na ndehe.

¹¹ Ta janda viti ndóho tá ndóho ini nde. Java tañu coó ña cuxu nde ta coó ticuúí coho nde ta ni jáhma candixi nde coó. Ta janda joho cája xíxi ñayivi xihín nde. Ta ni vehe nde coó.

¹² Ta a juú quiahva ndúcú ndéé nde cája chúun nde catacu nde. Ta tá chícaan ñayivi cuachi jatá nde já xíca tahví nde nu Ndióxi ña ná caja mé á ñamaní xihín ná. Ta cája ndeé ini nde tá cája xíxi na xihín nde.

¹³ Ta vitá cáhan nde tá ndúcú ñehe nde tuhun nuú ñayivi vatí cáhan núu na sahá nde. Mé nde cúú nde tátuhun xehe nuú ñayivi ñuyíví. Ta cája na xihín nde tá quiahva cája na xihín ñaha coó saha, ña nacandoo cūhun cuíta. Ta quiahva já cája na xihín nde janda viti.

¹⁴ Xíní ñúhú candaá ini ndó ña cō cáhyí i ña yóho nu ndo sahá ña cúni jácacahan i nuu ndo. Cáhyí i ña

nu ndo jáchi cúú ndó tátuhun jahyi i. Ta jánaḥa i ña nu ndo tá quiahva cája in dataa xihín jahyi da jáchi quíhvi ini i ndohó.

15 Jáchi vatí ná coo uxu mil ñayivi jánaḥa na ndohó sahá Jesucristo joo in túhún yehe cúú tátuhun tátá ndo. Jáchi yehe cúú u da naçahan tuhun vaha sahá Jesucristo nu ndó nu cuítí ta já naçandee ini ndó mé á.

16 Sahá ña cán quéa xíca tahví i nu ndó ña ná caja ndó tá quiahva cája i.

17 Sahá ña cán quéa chindahá i Timoteo nu ndo jáchi cúú dá tátuhun jahyi maní i ta cája chúun da cuéntá Jesucristo, xitoho í xihín ndinuhu ini da. Ta jándicuhun ini da ndohó ndá quiahva cája i tañu na cúú cuéntá Jesús ta ndá quiahva jánaḥa i nu ná ndijáá veñuhu nu xíca i cuahan i.

18 Java ndó naçasahá ndo cája lándá ndó jáchi cáhán ndo ña a sáa ga i coto nihni i ndohó.

19 Joo yachi saa i coto nihni i ndohó tá cúni Ndióxi. Anda já candehé e, á mé a ndaa íin ndée Ndióxi ini na xíca cája lándá jan á yúhu uun na cahan na.

20 Tá mé a ndaa cómi Ndióxi cuéntá sahá in ñayivi já quéa íin ndée mé á ini na caja na ña cúni mé á. Ta coó saha toho a á tiaḥva ndivaḥa na cahan na.

21 Ta viti cachi ndó xihín i ndía quéa catóo chága ndo. Á catóo chága ndo ña ná saa i jánani i ndohó sahá ña cája ndó ña núu. Á catóo chága ndó ña ná saa i ta vií vií cahan i xihín ndo jáchi najándacoo ndó ña núu cája ndó. Ndía cúni ndó.

5

Cáhan Pablo sahá in da ín xihín náná queén da

¹ Sa ñañehé e tuhun ña ín in da cúu cuéntá Jesús tañu ndó ñan ta ín da xihín náná queén da. Ta ña yóho cúu á in cuachi cáhnu ndivaha. Ta ni ñayivi ñuyivi co cája ña yóho.

² Ta vatí ín cuachi cáhnu yóho tañu ndó joo cáa ga ri ndóhó cája cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó da cája cuachi yóho tañu ndó ñan.

³ Vatí co ín i xihín ndo ñan joo ndícani ndivaha ini i sahá ña cúu ñan. Ta cúu á tátuhun ín i xihín ndó ñan ña cán quéa sa ñasacu ini i ña xíní ñúhú caja ndó xihín da cája cuachi ñan.

⁴ Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndée á nu ndo caja ndó ña cúní mé á. Ta cacuu a tátuhun coo i xihín ndó ñan.

⁵ Anda já xíní ñúhú ndiquiahva ndó da ñan ndáha tiñáhá sacuahá já ná jándoho rí ini yiquí cuñu da viti ta já ná cuu cacu ndaa ínima dá tá ná xinu coo quiví quixi tucu Jesucristo.

⁶ Co ndítahan caja lándá ndo sahá ña cája ndó. Xíní ñúhú ndicuhun ini ndó in tuhun ña cáchí já: “Chá cuití yúsa ñaxaa jativí ndihi a java yúsa ña ín vaha.”

⁷ Xíní ñúhú tavá ndo da ñan tañu ndó jáchí cúu dá tátuhun yusá ñaxaa, ña jativí ña ín vaha. Ta xihín ña yóho quee ña núu veñuhu nu táca ndó ñan jáchí sahá da ñan cuu caquini inga na ta caja na cuachi. Xíní ñúhú canduu vií ndo tátuhun mé pan xíxi na vicó pascua jáchí coo yusá ñaxaa ñúhu xihín á. Ta

Jesucristo ñasacuu a tátuhun in ndicachi, rí najoco ña nu Ndióxi vicó pascua sahá cuachi ñayivi jáchi ñaxihí a ndica crúxu sahá cuachí já ná cuu cacu ndaa ínima yo.

⁸ Sahá ña cán queá ndítahan cajii iní sahá ña ñacaja Jesucristo. Xíni ñúhú jándacoo í ña núu sa ñacaja í jihna, ña cúu tátuhun pan ñaxaa. Ta xíni ñúhú caji í ña ndaa xihín ndinuhu iní. Ta ña yóho cúu á tátuhun pan ña coó ñacava táhan yusá ñaxaa xihin.

⁹ Nu carta ñachindahá i nu ndó jihna ga, ñacachi i xihin ndo ña ná a catáhan ndó xihín ñayivi, na ndúu xihín ña co cúu yí ná á ñájíhí ña.

¹⁰ Tá ñacachi i ña yóho xihin ndo co cúni cachi a ña xíni ñúhú tavá xóo ndó mé ndó chí in ndeé nuú ñayivi ñuyiví yóho jáchi a cuú quee ndó ñuyiví yóho cuhun ndo. Ta mé a ndaa ndúu cuahá ña ñuyiví yóho cája na cuahá cuachi xihín yiquí cuñu na ta catóo ndivaha na jjuhún ta cája cuíhná ña ta cája cáhnu na yoco.

¹¹ Ña cúni cachi i xihin ndo queá co ndítahan catáhan ndó xihín ña cáchi cúu cuéntá Jesús nani cája na ña núu xihín yiquí cuñu na, á tá cúu ná ña catóo ndivaha jjuhún, á tá cúu ná ña cája cáhnu yoco, á tá cúu ná ña tuhún, á tá cúu ná ña xihí, á tá cúu ná ña cuíhná. Ta ni a cácoo ndó cuxu ndó xihin ná tá cája na ña yóho.

¹² Co cáhan i sahá ñayivi ñuyiví jáchi co ndítahan nuú i caji vií i saha ná. Joo ndítahan nu ndó candehé ndo ndaja cája ña cúu cuéntá Jesús ndúu tañu ndó jan.

¹³ Jáchi mé Ndióxi queá caji vií a sahá cuachi

ñayivi ñuyíví. Ña cán quéa ndítahan nu ndó tava ndó da cája cuachi tañu ndó jan.

6

Tá sácú saha táhan na cúu cuéntá Jesús nuú na jutixia

¹ Tá co táhan ini ndó xihín ña cája ñani ndó, na cúu cuéntá Jesús co ndítahan nu ndó cuhun ndó cacu ndó saha ná nuú na jutixia, na co cúu cuéntá Jesús. Ña ndítahan caja ndó quéa cahan ndó xihin mé na cúu cuéntá Jesús ña ná caja vii na saha ña co táhan ini ndó xihín jan.

² Á co xini ndó tandaa quivi caja vii na cúu cuéntá Jesús saha tóco ndihi ñayivi ñuyíví. Ta tá mé ndó cacuu ndó na caja vii saha tóco ndihi ñayivi ñuyíví, ndá cuéntá quéa co cuni ndó caja vii ndó saha ña válí cúu tañu mé ndó jan.

³ Ña xini ñuhú caja ndó quéa nducú ndo caja vii ndo saha ña cúu tañu ndó jan. Jachi xini ñuhú ndicuhun ini ndó ña janda tát Ndióxi caja vii yo saha.

⁴ Saha ña cán quéa tá cáni táhan ndó saha ñaha válí ñuyíví yóho co xini ñuhú toho cuhun ndó cavií saha ndó nuú na co cúu cuéntá Jesús.

⁵ Candehé ndó. Cahan i ña yóho xihin ndo já ná cacahan nuu ndo. Á co ín in da tácu ini tañu ndó jan ña ná caja vii da saha ndó, vaha. Xini ñuhú ndindita in da tácu ini já ná cuu caja vii da saha ña cúu tañu ndó jan.

⁶ Joo ña cája ndó quéa cáni táhan ndaja táhan mé ndó ta já ndáca táhan ndó cuahan ndó cavií saha

ndó nuú na co cúu cuéntá Jesús. Co ndítahan toho caja ndó já.

⁷ Sa cuachi cáhnu ndivaha quéa cája ndó tá cáni táhan ndaja táhan mé ndó jan. Vaha ná caja ndeé ini ndó tá co cája vaha in na xihín ndo. Vaha ná caja ndeé ini ndó tá ná caja cuíhná na ñaha ndó. Jáchi co ndítahan cacu saha táhan ndó nuú na co cúu cuéntá Jesús.

⁸ Joo ña cája ndó quéa ña núu xihín ñani táhan ndó ta janda cája cuíhná ndo ñaha ñani ndó, na cúu cuéntá Jesús.

⁹ Xíní ñúhú candaá ini ndó ña coó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchi na ndúu xihín na co cúu yí ná á ñájíhí na a cuhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yí á ñájíhí inga na ta ni da cúu ta líhí a cuhun toho na nu Ndióxi.

¹⁰ Ta ni na cuíhná ta ni na cátóo ndivaha jjuhún ta ni na xihí ta ni na ndahnda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá saha ná.

¹¹ Ta táhan na yóho nasacuu ri java ndóhó va, nduu. Joo viti sa nandaja vii Ndióxi ndohó ta nacaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña nacaja Jesu-cristo, xitoho í ta sahá ña cája ínimá yii Ndióxi.

Xíní ñúhú candaá í yiquí cuñu í jáchi cúu á ña yii

¹² Ndúu java ñayivi ta cáchí na ña núná nu ná caja na ña cúni mé va na. Vatí mé a ndaa núná nu ná caja na ña cúni mé ná joo xíní ñúhú candehé na á vaha, á a váha ña cája na. Jáchi mé a ndaa núná

nu yō caja í ña cúní mí joo cō ndítahan quiahva í ñamani ña ná cahnu ña núu yiquí cuñu í.

13 Ta cáchí na ña ín tixi yó sahá ña cán quéa xíní ñúhú cuxú. Ta cáchí na ña xíní ñúhú cuxú jáchi ín tixí. Joo vaxi quiví jándihi Ndióxi saha ndíví ña yóho. Ta coó nasahan Ndióxi yiquí cuñu í nu yō ña ná caja í cuachi xihín á tátuhun ña ná coo í xihín na cō cúu ñájíhí yō á yí yō. Nasahan Ndióxi yiquí cuñu í nu yō já ná caja í ña cúní mé á. Ta nacaja mé á ña ná cacomí a cuéntá saha yō.

14 Ta tá quiahva nacaja Ndióxi najánditacu a Jesucristo, xitoho í quiahva já caja rí a jánditacu a yiquí cuñu í xihín ndéé mé á.

15 Xíní ñúhú candaa ini ndó ña in cúu ndó xihín Jesucristo. Ta tá cuahan ndó cája ndó cuachi xihín najihí xíca jii, cúu á tátuhun ñéhe ndó Jesucristo cuahan cája ña núu. Cō ndítahan caja ndó já.

16 Sa xíní vaha ndó ña tá quíhvi nuu in dataa xihín najihí xíca jii já quéa ndúu na tátuhun in víxí ñayivi. Jáchi cáchí tuhun Ndióxi já: “Tá ná ndique táhan in dataa xihín in ñáñáha já quéa ndúu na tátuhun in víxí ñayivi.”

17 Ndá na ndiquiahva mé ndáha Jesucristo, xitoho í já quéa in ndúu na xihín mé á jáchi ñúhu ínima yii Ndióxi ini na.

18 Cama caxoo ndó nu tóco ndihi ña núu xíca ini yiquí cuñu ndó caja. Cō ndítahan coo ndó xihín na cō cúu ñájíhí ndo á yí ndo jáchi ni in túhún toho cuachi cō cája quini nahá xihín yiquí cuñu ñayivi tátuhun cuachi yóho. Jáchi ndá na ín xihín na cō cúu yí ná á ñájíhí na já quéa cája na cuachi nuú yiquí cuñu mé va na.

19 Xíní ñúhú ndicuhun ini ndó ña mé yiquí cuñu ndó jan cúú á tátuhun in veñuhu nu ndácaan ínima yíi Ndióxi, mé a ñasahan Ndióxi nu ndo. Ta viti yiquí cuñu ndó a juú ñaha mé ndó cúú á jáchi cúú á ñaha Ndióxi.

20 Jáchi yahvi ndivaha nachahvi Ndióxi saha ndo tá ñaxihí Jesucristo ndica crúxu. Saha ña cán quéa ndítahan caja cáhnu ndó Ndióxi xihín yiquí cuñu ndó ta jári xihin ínima ndo jáchi ndíví a cúú á cuéntá Ndióxi.

7

Tá tándaḥa ñayivi

1 Ta viti cúni nducú ñehé e tuhun nu ndo sahá ña ñandaça tuhún ndó yehe nu carta nachindahá ndó nuú i. Cáchi i xihin ndó sahá da cámani tandaha ña vaha cája da tá ná coo tacú da.

2 Joo sahá cuachi cája ñayivi tá ndúu na xihín na co cúú ñájihí na á yíi ná sahá ña cán quéa vaha chága ná tandaha ná já ná coo ñájihí in in ta ta jári ñajihí va ná coo yíi in in na.

3 Ta in dataa ndítahan ndiquiahva da mé dá nu ñájihí da ta jári ñáñáha ndítahan ndiquiahva ña mé ñá nu yíi ña jáchi quiahva já sáhdá a coo a.

4 Jáchi in ñáñáha, ña ñatandaha co cómi ga ña cuéntá saha mé ña jáchi yíi ña cúú da cómi cuéntá saha yiquí cuñu ña. Ta ni in dataa, da ñatandaha co cómi ga da cuéntá sahá yiquí cuñu da. Ñájihí da cúú ña cómi cuéntá sahá yiquí cuñu da.

5 Saha ña cán quéa ndítahan ndiquiahva nu táhan ndó ta a cándají táhan ndó. Ta tá co cúni ndó cuju xítahan ndó xíní ñúhú cacuu a sahá ña sa

najándique táhan tuhun ndó ña a cúju xitáhan ndo sahá ña cúni ndó caça tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchi tiahva náá jácahan Satanás, mé tiñáhá sacuaḥa ndohó ña ná caja ndó cuachi sahá ña a cuú cañu ndó nuú ña xíca ini yiquí cuñu ndó caja.

⁶ Tóco ndihí ña cahan i xihín ndo yóho co cúni cachi a ña xíní ñúhú tándaḥa ndo vatí cuu tandaḥa ndo tá cúni ndo.

⁷ Vatí mé a ndaa cájji íní i tá ná canduu tacú ndihí ndó tátuhun yehe. Joo sa jín sa jín naçaja Ndióxi xihín in in í. Java na ñéhe táhví ná tandaḥa na ta java na ñéhe táhví na canduu tacú na.

⁸ Ndá na ndúu tacú xihín ndá na ndúu cuáan, ña vaha chága quéa ná a tándaḥa ná ta ná canduu na tátuhun yehe.

⁹ Joo tá co ndeé ini na cañu na yiquí cuñu na, vaha chága ná tandaḥa ná jáchi vaha chága ná tandaḥá ñayivi a juú ga ña ná ndiava íní na coo na xihín na co cúu yíi ná á ñájhí na.

¹⁰ Ta nu ndóhó, na sa ín yíi á ñájhí, sáhdá i chuun nu ndó ña ná a jándacoo táhan ndó. Ta ña sáhdá i nu ndo yóho co cúu á ña naquixi jiní mí i. Cúu á ña sáhdá Ndióxi caja ndó. Co ndítahan nuú in ñáñáḥa jándacoo ña yíi ña.

¹¹ Ta tá ná jándacoo ña da, co ndítahan nu ña tandaḥa ña xihín inga da. Á tá coo ta ña ndítahan caja ña quéa ndique táhan maní tucu ña xihín yíi ña. Ta jári in dataa co ndítahan nu dá jándacoo da ñájhí da.

¹² Ín java ga ñaha cúni cahan i xihín ndo. Mí i

cáhán i ña vaha caja ndó ña vatí mé a ndaa co cúu á ña nasahnda Ndióxi nuú i jánaha i nu ndo. Ta ña yóho quéa ña cahan xihin ndo: Tá íin in da cúu cuéntá Jesús ta íin ñájíhí da, ñá co cúu cuéntá Jesús. Ta tá cájii ini ñá coo ñá xihin dá já quéa co ndítahan nu dá jándacoo da ña.

¹³ Ta tá íin in ñá cúu cuéntá Jesús ta íin yíi ña, da co cúu cuéntá Jesús. Ta tá cájii ini da coo da xihin ña já quéa co ndítahan jándacoo ñá da.

¹⁴ Jáchi cája yii Ndióxi in dataa sahá ña íin da xihin ñájíhí da, ña cúu cuéntá Jesús. Ta jári cája yii Ndióxi in ñáñáha sahá ña íin ñá xihin yíi ña, da cúu cuéntá Jesús. Jári cája yii Ndióxi jahyi na yóho ná a cácuu na tátuhun na co xini Ndióxi. Ta xihin ña yóho cuu candaa ini na ndaja íin íchi cuéntá Jesús.

¹⁵ Joo tá cúní yíi ndo á ñájíhí ndo, na co cúu cuéntá Jesús jan, quee na cuhun na já quéa quiahva ndó ñamaní nu ná caja na ña. Jáchi co ndítahan nu ndó caja ndúsa ndó xihin na co xini Ndióxi cán ña ná coo na xihin ndo. Jáchi cúní Ndióxi ña ná canduu vii ndo.

¹⁶ Ta ni co xini ndo á ndiquehe yíi ndó á ñájíhí ndo íchi cuéntá Jesús, á a ndíquehe na ña.

¹⁷ Ta cáxi tuhun i nu tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva nasahiin na tá nandihvi na íchi cuéntá Jesús jáchi quiahva já cúní Ndióxi.

¹⁸ Ta tá naquihvi ndó íchi cuéntá Jesús ta sa ndacaan marca yiquí cuñu ndó coo caja toho a. Joo tá coo marca jan yiquí cuñu ndó co ndítahan chícáan ndó ña yiquí cuñu ndó.

¹⁹ Jáchi coo caja toho a á íin marca yiquí cuñu ndó

á coó a. Ña cúni Ndióxi quéa ná caja ndó ña sáhndá mé á nu ndo caja ndó xihín ndinuhu ini ndó.

²⁰ Ta ndítahan coo ndó tá quiahva nasahiin ndó tá nandiquehe ndó íchi cuéntá Jesús.

²¹ Ta tá nasacuu ndó na naxeen xitoho ndó caja chúun ndó tá nandiquehe ndó íchi cuéntá Jesús já quéa co ndítahan ndicani ini ndó sahá. Joo tá ná quiahva xitoho ndó íchi nu ndó ña ná quee ndó cuhun ndo já quéa caja ndó ña.

²² Jáchi da cúu cuéntá Jesús cúu dá da najaní Ndióxi nuú cuachi da vatí cándoo da cája chúun da cuéntá xitoho da, da naxeen ñahá. Ta da naxica núná mé tá nandiquehe da íchi cuéntá Jesús cúu dá mozo cuéntá Jesucristo.

²³ Jáchi yahvi ndivaha nachahvi Ndióxi saha ndo tá naxihi Jesucristo ndica crúxu ña ná cacomí a cuéntá saha ndo. Sahá ña cán quéa a ndiquiahva toho ndó mé ndó ndáha ñayivi ña ná cahnu na ndohó.

²⁴ Candehé ndo ñani mí i, na cúu cuéntá Jesús. Ndítahan coo ndó tá quiahva nasahiin ndó tá nacana Ndióxi ndohó cacuu ndó cuéntá mé á jáchi iin mé á xihin ndo.

²⁵ Ta viti cúni cahan i sahá na tacú, na cámani tandaha. Coó nacachi toho Ndióxi xihin i sahá ña yóho ña cán quéa cahan i ña cáhvi ini mí i sahá. Ta cuu candúsa ndó ña cahan i xihin ndo jáchi nacaja Ndióxi ñamani xihin i ña cúu u in da tácu ini.

²⁶ Ta cáhan i ña ndítahan coo tacú in dataa jáchi ihvi ndivaha cáa tiempo ndúu viti.

²⁷ Joo tá iin ñájihí ndo, a jándacoo ndó ña. Ta tá coó ñájihí ndo, a ndúcú ndó ña.

²⁸ Joo a juú cuachi quéa cája ndó tá ná tandaha

ndo. Ta ni a juú cuachi quéa cája in ñá tacú tá ná tandaha ña. Joo mé a ndaa ná cahan i xihin ndo, yáncá a tá ná tandaha ñayivi jáchi cuhá ndivaha ndoho ini na. Ta co cúni ña ná ndoho ini ndó já sahá ña cán quéa cahan i ña yóho xihin ndo.

29 Candehé ndo ñani i, na cúu cuéntá Jesús. Ña cúni cachi i cúu ña yóho: Sa nacayati tiempo quixi Jesucristo. Sahá ña cán quéa na ín ñájíhí xíní ñúhú ndíhi ini na caja chúun na cuéntá mé á tá quiahva cája chúun na tacú cuéntá mé á.

30 Ta ndá na ndúu cuéha ndivaha ndítahan caja na tátuhun na cájii ini. Ta na cájii ini ndítahan caja na tátuhun na ndúu cuéha ndivaha ini. Ta na xéen ñaha ñuyiví yóho ndítahan caja na tátuhun na xeen na ña co cúu ñaha na.

31 Ta na cómi ñaha ñuyiví yóho, xíní ñúhú ndindójó na sahá ñaha cán. Jáchi vaxi quivi ndíhi saha ñuyiví yóho xihin tóco ndíhi ñaha ín nu á.

32 Ña cúni yehe quéa ña ná a ndícani nahá ini ndó sahá ñaha ñuyiví yóho. Jáchi tá cámani tandaha in dataa já quéa núná nu dá caja chúun da cuéntá Ndióxi xihín ndinuhu ini da. Ta ndúcú da ndá quiahva caja da ña cájii ini Ndióxi xihin.

33 Joo da sa natandaha ndítahan caja chúun da ñuyiví yóho já ná cana ña cuxu na vehe da. Ta cája da ña cájii ini ñájíhí da xihin.

34 In da natandaha co xíni da ndía ndíhi chága ini da saha, á Ndióxi á ñájíhí da. Ta jári najihí tá cúu ná na tacú ndíhi ini na caja na ña cúni Ndióxi jáchi ndiquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínimá ná. Joo najihí ndúu yíi ndíhi ini na sahá chuun vehe na

jáchí cúní ña ña ná tahan ini yí ná xihín ná.

³⁵ Cáhán í ña yóho xihín ndo jáchí cúní chindeé e ndohó ta cō cáhán í ña sahá ña cō cúní ña ná tandaha ndo. Ña cúní quéa ná nuná nu ndó caja chúun ndó cuéntá Ndióxi xihín ndinuhu ini ndó ta ná a cájí nuu ni in ñaha nu ndó caja ndó ña cúní Ndióxi.

³⁶ Ta ndá da íin jahyi jíhí ta cáhán da ña ndítahan tandaha ña jáchí sa cuahá cuia ña já cuu quiahva da ña ña ná tandaha ña tá cúní da. A juú toho cuachi cúu ña yóho.

³⁷ Ta tá cáhán ndo ña cō ndítahan toho tandaha jahyi ndó ta cáhán ndo ña cájí ini ña ña coo mé ña já quéa vaha va cája ndó tá cō cája ndúsa ndó xihín ña ná tandaha ña.

³⁸ Vaha cája in dataa tá sáhan da ñamaní nuú jahyi jíhí da ña ná tandaha ña. Joo vaha chága cája da tá cō cája ndúsa dá xihín ña ña ná tandaha ña.

³⁹ Ta a cuú tandaha in ñañáha xihín inga dataa nani tácu yí ña. Joo tá naxihí yí ña já quéa candoo núná nu ña tandaha tucu ña. Joo ndítahan tandaha ña xihín da cúu cuéntá Jesús.

⁴⁰ Vatí cáhán í ña cají chága ini ña tá ná a tandaha tucu ña. Ña yóho quéa cáhvi ini í sahá ña yóho. Ta ínimá yí Ndióxi quéa jácahan yehe cáhí í ña yóho xihín ndo.

8

Cáhan Pablo sahá ña najoco ñayivi nuú yoco

¹ Ta viti cúní ndicani í nu ndo sahá ña ndítahan caja ndó xihín ña najoco na nuú yoco. Vatí cúu á ña ndaa tá cáhí java na ña xíní vaha na sahá ña yóho

joo tá cáhán yó cúú yó nā xíní vaha já queá cásahá yó ndíñehe jícó yó mí. Joo tá quíhvi íní ñani táhan í já ndindaçú chága yó xihín ñaha Ndióxi.

² Tá ndúu java na tañu ndó ta cáhán nā ña sa xíní nā ndaja táhan ñaha, nā yóho náha ña cámaní cándaā ini na ña ndítahan cándaā ini na.

³ Jáchi mé a ndaa xíní vaha Ndióxi ndá nā cúú nā quíhvi ini mé á.

⁴ Ta viti cáhan í xihín ndo sahá ña najoco nā nuú yoco. Cándaa cáxí íní ña coó a cúú toho yoco ndúu ñuyíví. Ta cándaā cáxí íní ña in tálaá Ndióxi cúú ndusa Ndióxi.

⁵ Vatí cáhí ñayivi ña ndúu cuahá ndiόxi ta ndúu cuahá xitoho indiví xihín ñuyíví

⁶ joo mí cándaā vaha íní ña ín in túhún Ndióxi, mé a cúú tátá yó. Ta mé á queá ñacavaaha tóco ndihi ñaha. Ta ñacavaaha mé á mí ña ná caja cáhnu í mé á. Ta ín in túhún xitoho í ña cúú Jesucristo. Ta mé á queá cája ña ná coo tóco ndihi ñaha ta cája ña ná catacu mí viti.

⁷ Joo a juú tóco ndihi nā cúú cuéntá Jesús xíní ña yóho. Jáchi java táhan nā sa cája cáhnu yoco sanahá cán tá xíxi na ña najoco ñayivi nuú yoco cáhán nā ña cúú á ña najoco nā nuú java ndiόxi. Ta xihín ña yóho cáhán nā ña cúú ná nā sa ñayuxu sahá ña naxixi na ña najoco ñayivi nuú yoco. Ta co xíní nā á ndítahan cuxu na ña á co ndítahan cuxu na ña.

⁸ Cándehé ndo. Co ndíquehe toho Ndióxi mí sahá ña xíxí. Jáchi co cúú yó nā ín chága saha tá xíxí in ñaha. Ta ni co cúú yó nā coó saha tá co xíxí ñaha.

⁹ Joo xíní ñúhú candehé ndo ña ná a jándicava ndó inga na nuú cuachi sahá ña cája ndó jan. Jáchi vatí

xíni vaha ndó ña cuu cuxu ndó ña cán joo ndúu java na vitá cuahan íchi cuéntá Jesús.

¹⁰ Cúu á tátuhun sácoo ndó cuxu ndó nu cáyahvi ña najoco na nuú yoco jáchi sa xíni ndo sahá ña yóho. Ta nani íin ndó xíxi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xíni da ndohó já quíhvi da jan xíxi da xihín ndo vatí cáhán da cúu á cuachi.

¹¹ Xihín ña cája ndó jan cuu jándicava ndó da vitá xihín ñaha Ndióxi cán nuú cuachi vatí xíni vaha ndó ña co cája ndó cuachi tá ná cuxu ndó ña najoco na nuú yoco. Xíni ñúhú ndicuhun ini ndó ña naxihí Jesucristo sahá da jan.

¹² Tá jándicava ndó ñani ndó, da vitá xihín ñaha Ndióxi cán nuú cuachi já quéa cája ndó cuachi nuú Jesucristo viti.

¹³ Sahá ña cán quéa tá ná jándicava i ñani i nuú cuachi sahá ña xíxi i cuñu, ña najoco na nuú yoco cája i cuéntá a cuxu ga i ña já ná a jándicava i inga da nuú cuachi.

9

Ña núná nuú in na apóstol caja

¹ Mé a ndaa yehe cúu u in apóstol cuéntá Jesucristo sahá ña cán quéa núná nuú i caja i ña cája in apóstol. Jáchi mí i sa naxini i xihín nuú i Jesucristo, xitoho í. Ta mé ndó nandiquehe ndó íchi cuéntá mé á sahá chuun nacaaja i ta ña yóho náha ña mé a ndaa cája chúun i cuéntá mé á.

² Cája i cuéntá ndúu java na ta co ndíquehe na yehe tátuhun in apóstol cuéntá Jesucristo. Joo ndóhó ndítahan ndiquehe ndó yehe jáchi nanduu

ndó cuéntá mé á sahá chuun naçaja i. Ta xihín ña yóho náha ña mé a ndaa cúu u in apóstol cuéntá mé á.

³ Ta ña yóho cúu tũhun ndúcú ñehe e nuú na cáhan núu sahá i jan:

⁴ Íin sahá i ña ná coto ndó yehe.

⁵ Ta tá ná coo ñájíhí i, ñá cúu cuéntá Jesús ín sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í.

⁶ Á cáhan ndo ña in túhún yehe xihín Bernabé cúu nde da coó saha ña ná coto na cúu cuéntá Jesús ndehe, vaaha.

⁷ Jáchí ni in túhún toho soldado co quéhe da jũhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchí já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchí já cáni a coo a.

⁸ Ta a juú cahán ndo ña cáhan i ña quíxi jiní mé cuití vî jáchí cáhí ley mé Moisés ña yóho viti.

⁹ Já cáhí a já: “A chácaun ñunu yuhú tĩndiqui nani cája chúun rí sání rí trigo. Joo xíní ñuhú quiahvún ñamaní nu rí caxí rí a”, cáhí tũhun Ndióxi. Joo co ndíhi ini Ndióxi sahá tĩndiqui cuití va.

¹⁰ Saha mí ví naçahyí Moisés ña yóho ta saha mí ví cáhan ña yóho tá cáhí a já. Cúu á tátũhun cája da xútu tátí xihín da jáquee tátí jáchí ndátí ndíví da ndiquehe da táhan nuní cán sahá ña naçaja chúun da xihín á.

¹¹ Tá naçahan nde tũhun Ndióxi xihín ndó já cúu á tátũhun naçihín nde tata cuéntá Ndióxi ini ínima ndo. Sahá ña cán quéa ndítahan nu ndo chindeé

loho ndó ndehe xihín ña cómi ndo jáchi najána ha nde tuhun Ndióxi nu ndo.

¹² Ta mé a ndaa íin chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coó naca ja ndúsa nde xihin ndo ña ná caja ndó ña. Ta cuahá tañu cája ndeé ini nde jáchi co cúni nde caji nuu nde ña ná ndicuíta nuu tuhun vaha sahá Jesucristo.

¹³ Mé ndó sa cánda a vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quíti, rí najoco ñayivi nu Ndióxi.

¹⁴ Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde.

¹⁵ Joo ni in túhún tañu coó naca ja ndúsa i xihin ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa íin vaha ini i cáhan i tuhun Ndióxi xihin ndo ta coó caja toho a ña ná quivi i joco.

¹⁶ Yehe co ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúu á chuun ndítahan nuú i caja i. Ta ndáhví nahá nacuu u tá ná caja sáa ini i caxi tuhun i ña.

¹⁷ Tá ná cája i chuun yóho sahá ña cúni mí i cuití va já quéa cuu quehe e yahvi sahá. Joo co cája toho i já jáchi nacaxi Ndióxi yehe cáhan i tuhun mé á sahá ña cán quéa ndúsa cája i ña.

18 Ta sa mé yahvi quéhe e sahá chuun cája i quéa cájii ini i tá cáhan i tuhun vaha sahá Jesús nuú ñayivi ta co cháhvi na sahá. Ta cájii ini i jáchi co cája ndúsa i xihín ndo ña ná coto ndó yehe tá quiahva cája ndó xihín java ga na cáhan tuhun Ndióxi xihín ndo.

19 Vatí mí i co cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchi cáxi tuhun i tuhun vaha sahá Jesucristo nu ná já ná cuu ndicuaḥa chága na cúu cuéntá Jesús.

20 Tá xíca nuu i tañu na Israel ndája i mí i tátuhun in da Israel jáchi ña cúni quéa ná ndiquehe na íchi cuéntá Jesús. Ña cúni cachi i quéa tá iin i tañu na cája ley Moisés in cája i xihín ná vatí co ndíco i íchi cuéntá ley Moisés viti. Joo cája i ña sahá ña cúni i ña ná ndiquehe na íchi cuéntá Jesús.

21 Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchi cúni ña ná ndiquehe na íchi cuéntá Jesús. Joo co cája i cuachi tá quiahva cája na cán jáchi sáhdá ley Ndióxi chuun nuú i viti ta cája i ña cúni Jesucristo cuití va.

22 Ta tá xíca nuu i tañu na vitá xihín ñaha Ndióxi já quéa jánuu ndáha i mí i jáchi cúni ña ná ndindacú na xihín tuhun mé á. Ña cúni cachi i xihín ndo quéa ndája i mí i tátuhun ndá na nacuu va jáchi cúni quee vaha i xihín ná já ná ndihvi na íchi cuéntá Jesús ña ná cacu ndaa ínimá ná.

23 Cája i tóco ndihi ña yóho já quéa ná ndicuita nuu tuhun vaha cáhan sahá Jesucristo. Jáchi xihín ña yóho caja cuaḥa Ndióxi ñamanj xihín i.

24 Candehé ndo. Sa xíni vaha ndó ña tá jáquehe táhan java taḥa tuhun da ña ná cunu da, mé a ndaa

tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíni ñuhú nducú ndo cuhun vaha ndó íchi cuéntá Jesús janda quiahva ná xinu coo ndó janda nu ndíhi cuíi já ná quiahva Ndióxi nu ndo ña ndítahan ndiquehe ndó.

²⁵ Tóco ndihi ñayivi tá cája tiahva na mé ná ña ná cuhun na cunu na, co cúni na caja na ndá ña nacuu jáchi ndáá na mé ná. Tóco ndihi ña yóho cája na sahá ña cúni na quee vaha na ña ná ñehe ná in tiyivi ita sánúu jini ná vatí cama chá íchi ita cán. Joo mí ndúcú ndéé yo cuahan yó íchi cuéntá Jesús jáchi ña ndátí mí quiahva Ndióxi nu yo co ndíhi saha anda ama cáa quivi.

²⁶ Joo co cúu u in da xínu cuáá. Ta ni co cúu u tátuhun in da jácana yiquí nuú tachi. Jáchi ndúcú ndéé e quee vaha i já ná ndiquehe e ña quiahva Ndióxi nuú i.

²⁷ Ña cája i quea cája ndúsa i xihin yiquí cuñu i ña ná caja i ña cúni Ndióxi. Jáchi a juú tiahva náá jándacoo Ndióxi yehe vatí mí i cúu u da najánaña tuhun Ndióxi nuú ñayivi.

10

Cáhan Pablo ña co ndítahan caja cáhnu na yoco

¹ Candehé ndo ñani i, na cúu cuéntá Jesús. Co cúni ña ná ndindójó ndo ndá quiahva nacaja Ndióxi sanahá xihin tásáhnu jícó yo tá nasandaca mé á na yucú íchi cán. Nacaja mé á ña ná xinu in vico núhú xoo nuú cuahan na ña ná candaca a na.

Ta nachindeé a na ña ná cuu cojo cava na tañuhú nani tañuhú cuáhá.

² Ta tóco ndihi na cán in nanduu ndihi na xihín Moisés tá nayaha na tañuhú nani ndáca vico núhú na. Nasacuu a tátuhun nacandúta ná ña ná cacomí Moisés cuéntá saha ná.

³ Ta tóco ndihi na cán naxixi na ña nachindahá Ndióxi, ña naquixi a nu ná chí indiví.

⁴ Ta quiahva já tóco ndihi na cán naxihi na ticuúí, dó nasahan mé á nu ná coho na. Mé ticuúí cán cúú dó dó nacana tixi in tóto. Ta mé tóto cán cúú á tátuhun yuhú nu Jesucristo, mé a nasahin xihin ná nani naxica nuu na yucú íchí cán.

⁵ Joo cuahá ndivaha táhan na cán nacaja na ña núu ña co cáji iní Ndióxi xihin. Sahá ña cán queá naxihi na mé yucú íchí nu xica na cuahan na cán.

⁶ Tóco ndihi ña nayaha yóho jánaha nu mí ña co ndítahan ndiava iní ña co táhan ini Ndióxi xihin tá quiahva nacaja na cán.

⁷ Sahá ña cán queá coto a juú caja cáhnu ndó yoco tá quiahva nacaja java na cán jáchi já cáchí tuhun Ndióxi já: “Tóco ndihi ñayivi cán nasacanduu na xixi na ta xíhi na ta já nandicuita na xíta sáhá na ña cája cáhnu na yoco”, já nacaja na cáchí tuhun Ndióxi.

⁸ Joo mí xíní ñuhú candaa í mí já ná a cája í cuachi ña quihvi nuu í xihín inga najihí á xihín inga dataa tá quiahva nacaja java na cán. Ta sahá cuachi nacaja na cán naxihi oco uní mil na in túhún quivi.

⁹ Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já nacaja java na cán va ta sahá ña cán naxihi na nacaja cuahá

COO.

¹⁰ Coto a cáhan cuéhé ndó saha Ndióxi tá quiahva nacija java tásáhnú jícó yó cán. Jáchi sahá ña nacija na naxihí na nacija tátó Ndióxi, mé a xíca sáhní ñahá.

¹¹ Tóco ndihi ña nayaha xihín tásáhnú jícó yó cúú á ña náha nu yó ña co ndítahan quehe núu í Ndióxi. Ta nacyhi a nuú tuhun Ndióxi já ná cuni mí, yó ndúu tiempo yóho ña co ndítahan caja í tá quiahva nacija na cán jáchi sa nacyati quivi ndihi saha ñuyíví.

¹² Ña cán quéa tá cáhán ndo cuahan vaha ndó íchi cuéntá Ndióxi já quéa xíní ñúhú candaa vaha ndó mé ndó já ná a ndícava ndó nuú cuachi.

¹³ Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuú jáchi quixi tondóhó jan nu tóco ndihi java ga ñayivi. Ta ndítahan candeeé ini ndó Ndióxi jáchi a quiahva toho mé á ñamaní ña ná quixi tondóhó náhnú nu ndo ña co cándeé ndó xihín. Ña cája Ndióxi quéa chindeé a ndohó tá ná quixi tondóhó nu ndo já ná cuu caja ndeé ini ndó tá ná ndoho ndó ña.

¹⁴ Candehé ndo ñani i, na cúú cuéntá Jesús. Xíní ñúhú jándacoo vaha ndó ña cája cáhnú ndó yoco.

¹⁵ Tá quiahva cáhan i xihín ñayivi tácu ini quiahva já cáhan i xihín ndo. Ta mé ndó cándaá vaha ini ndó á ndaa á a ndaa quéa cáhan i xihín ndo.

¹⁶ Ná ndiquiahva í ndixahvi nu Ndióxi tá ndicuhun iní sahá ña nacija Jesucristo tá naxihí a saha yo. Jáchi tá xihí vino ña yii já cúní cachi a ña in nanduú xihín mé á sahá ña naxita nii mé á ndica cruxu saha yo. Ta jári tá xixí pan ña yii ña

sáhn_{dá} java n_u táhan í cúni cachi a ña in nanduú xih_{in} mé á jáchi nandiquiahva yiquí cuñu a saha yo.

17 Ta vatí cuahá ndivaha cúu yó joo in túhún pan sáhn_{dá} java í xíxi jáchi xih_{in} ña yóho náha ña in cúu ndihí xih_{in} Jesucristo.

18 Xíni ñúhú candehé ndo ndá quiahva cája na Israel jáchi tá sáxi na cuñu quíti, rí najoco inga na n_u náa cán já cúu á tátuhun mé ná nasahni na mé quíti cán ta najoco na rí. Quiahva já yáha xih_{in} mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña.

19 Joo xíni ñúhú ndicuhun ini ndó tá cáchi i ña yóho xih_{in} ndo co cúni cachi i ña íin sahá yoco. Ta ni co cúni cachi i ña íin chága sahá cuñu najoco na nuú yoco a juú ga inga cuñu.

20 Ña cúni cachi i xih_{in} ndo quéa tá ná joco ñayivi, na co xíni Ndióxi jan in quíti nuú yoco cúu á tátuhun joco na jan rí nuú tiñáhá va. Ta co cája toho na ña n_u Ndióxi. Ta cáxi tuhun i ña yóho xih_{in} ndo já ná a cáxi ndó cuñu jan jáchi tá ná cáxi ndó ña cacuu a tátuhun najoco rí ndóhó va ña nuú tiñáhá.

21 Jáchi a cúu cuhun ndo coho ndó ña najoco na nuú rí quini ta já quixi ndó coho ndó ña y_{ii} cuéntá Jesucristo, xitoho í. Ta ni a cúu cuxu ndó ña najoco na nuú rí quini ta já cuxu ndó ña y_{ii}, ña xíxi na tá ndicuhun ini na ña naxih_i Jesucristo, xitoho í.

22 A cája ndó ña yóho jáchi cúu á tátuhun cúni ndó jácojo ndó ini Ndióxi. Xíni ñúhú ndicuhun ini ndó ña co cúu ndó na ndacú chága a juú ga Ndióxi.

Sahá ña quíhvi iní ñani táhan í co ndítahan caja í ndá ña nacuu cúni mí caja í

23 Ndúu java na ta cáhí ña já: “Núná nu yō caja í ndá ña cúní mí caja í.” Vati ña yóho cúú á ña ndaa joo a juú ndihi ña cája í cája vaha xohō. Mé a ndaa núná nu yō caja í ndá ña cúní mí joo cō chindeé a mí cuahnu í xihín ñaha Ndióxi.

24 Cō ndítahan nu yō nducú yó ña vaha mí cuití yō. Ndítahan ndihi ini caja í ña vaha sahá ñani táhan í.

25 Cuu caxí ndó ndijáá cuñu cáyahvi nuú yahvi ta a ndáca tuhún ndō ndájá naquixi a já ná a cáhvi ivi joho ini ndó xihín á.

26 Jáchi ñaha Ndióxi, xitoho í cúú ñuyíví yóho xihín tóco ndihi ña ín nu á.

27 Candehé ndō. Tá ná cana in ña cō cúú cuéntá Jesús ndohó ña ná cūhun ndó cuxu ndó xihín ná, cuáhán ndō tá cúní ndō ta cuxu ndó tóco ndihi ña sácú ña nu ndó cuxu ndó. Ta a ndáca tuhún ndó ña á naquixi a nuú yoco. Cuxu ndó ña jáchi tá ná ndaca tuhún ndō ña já cuu casáhá ndicani ini ndó xihín á.

28 Joo tá sa nacaxi tuhun yachi ña xihín ndō ña cúú á cuñu najoco ña nuú yoco já quéa a cúxu toho ndó ña. Jáchi tá ná cuxu ndó ña já quéa caja ndó ña ná a vaha cuu ini mé ña cán.

29 Cáhan í ña yóho jáchi cúní ña ná caja vaha ndó sahá inga na. Cō cáhan í ña saha mé ndó.

Mé a ndaa ndúu java ndó ta cáhán ndō ña cō ndítahan ndihi ini ndó sahá ña cáhvi ini inga na jáchi cáhán ndō ña núná nu ndó caja ndó ña cúní ndō.

30 Ta java ndó cáhán ndō ña tá sa nandiquiahva ndó ndixahvi nu Ndióxi sahá ña xíxi ndó já quéa a cúú cahan núu ñayivi sahá ña cája ndó.

31 Joo cáchí i xihín ndó ña xíní ñúhú candehé vaha í ña cája í ná a jándicava í inga na nuú cuachi. Jáchi janda xihín ña xíxí ta xihín ña xíhí, xíní ñúhú caja cáhnu í Ndióxi.

32 Co ndítahan cacuú na jándicava inga ñayivi nuú cuachi jáchi tá cája í já cúu yó tátuhun yuu cándúhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cúu cuéntá Jesús.

33 Ta tóco ndihi ña cája i, cája i ña ná cajiini ndihi ñayivi xihín. Ta co ndúcú u ña vaha mí i jáchi ndúcú u ña ná cajiini ñayivi já ná cuu cacu ndaa ínimá ná.

11

1 Xíní ñúhú caja ndó tá quiahva cája yehe jáchi quiahva já cája i ña nacaja Jesucristo, xitoho í.

Ña ndítahan nuú najihí caja na tá cája cáhnu na Ndióxi

2 Cajiini íni i xihín ndo, ñani i, na cúu cuéntá Jesús. Jáchi ní tiempo ñúhu ini ndó sahá i ta cája ta cája ndó ña najánaha i nu ndo.

3 Joo cúni ña ná candaa ini ndó ña cúu Jesucristo jini nuú in in taa. Ta quiahva já in in taa cúu dá jini nu ñájihí da. Ta quiahva já Ndióxi cúu á jini nuú Jesucristo.

4 Sahá ña cán quea tá co cándaa in dataa yijini dá nani xíca tahví da nu Ndióxi á nani cáhan da tuhun Ndióxi nu táca ñayivi já quea náha ña co cája cáhnu da Jesucristo, mé a cúu jini nu mé dá.

5 Ta in ñañaha tá co chíjahvi ña jini ña nani xíca tahví ña nu Ndióxi á nani cáhan ña tuhun Ndióxi nuú ñayivi veñuhu já quea náha ña quehe núu ña

yíi ña, da cúu jini nu mé ñá. Cúu á tátuhun najatá ñá jini ña.

⁶ Jáchí tá cõ chíjahvi in ñáñáha jini ñá janda vaha chága ví ná jatá táhyí ñá jini ña. Joo tá cáhán ña ña quini canáha jini ña tá ná jatá táhyí ñá jini ñá já queá xíní ñúhú chíjahvi ñá jini ña.

⁷ Cõ ndítahan toho nuú in dataa chíjahvi da jini dá veñuhu jáchí mé dá cúu dá da ñacavaha Ndióxi xihín yuhú nu mé á. Ta mé dá cúu dá da náha ndá quiahva cáhnu cúu Ndióxi. Ta náha in ñáñáha ña yíi ñá cúu da jini nu ñá.

⁸ Jáchí xíní ñúhú ndicuhun ini ndó ña cõó ñatavá toho Ndióxi lásá yiquí ndíca ñáñáha já ñacavaha mé á dataa, vaha. Ña ñacaja mé á queá ñatavá a lásá yiquí ndíca dataa ta já ñacavaha mé á ñáñáha.

⁹ Jihna ñúhú ñacavaha Ndióxi dataa ta já ñacavaha mé á in ñáñáha chindeé ñá da.

¹⁰ Ta sahá ña jihna ñúhú ga ñacavaha Ndióxi dataa sahá ña cán queá ndítahan nuú in ñáñáha chíjahvi ñá jini ña ná nahá ñá nu tátõ Ndióxi ña mé a ndaa cája cáhnu ñá yíi ña.

¹¹ Joo mí, na cúu cuéntá Jesús ndítahan candaa iní ña xíní ñúhú táhan ta xihin ñáha.

¹² Vatí ñacavaha Ndióxi ñáñáha nu cuítí xihin lásá yiquí ndíca dataa joo viti tóco ndihi dataa cácu da ñuyívi yóho cája najihí. Joo tóco ndihi ñayivi tácu na jáchí já cúni Ndióxi.

¹³ Mé ndó xíní ñúhú candehé ndo á vaha á a váha toho ña ná a chíjahvi in ñáñáha jini ñá nani xíca tahví ña nu Ndióxi veñuhu.

¹⁴ Jáchí sa candaa vaha iní ña a váha toho cája dataa tá ín nani ijí jini dá.

15 Joo ndisáhnu náha ñáñáha tá íin nání ijí jini ña jáchi Ndióxi nasahan ijí jini ñá nu ña já ná chijahvi a jini ña.

16 Joo tá ndúu java na ta cõ táhán ini na xihín ña cáhan i yóho já queá cõ cúni toho i nditúhún ihvi i xihín ná sahá ña yóho. Jáchi xíní ñúhú candaa ini na ña ndijáá java ga na cúu cuéntá Jesús cája na tá quiahva cáchí i yóho tá táca na veñuhu.

Jánani Pablo na cúu cuéntá Jesús jáchi cõ cája ndisáhnu na tá táca na cajíni na ña yii cuéntá Jesús

17 Ta íin inga ñaha cúni cáhan i xihín ndó saha ta cõ táhán ini i xihín á. Jáchi ñañehé e tuhun ña cõ cája vaha ndó tá táca ndo veñuhu.

18 Cándehé ndo. Sa ñañehé e tuhun ña sáhdá java táhan ndó tá táca ndo cája cáhnu ndó Ndióxi. Ta cája i cuéntá cándúsa i ña cáchí na saha ndo.

19 Vatí mé a ndaa náha xicá a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó cõ cúu cuéntá Jesús.

20 Ta sahá ña sáhdá táhan ndó nu táca ndó jan, náha ña quehe núu ndó ña yii xíjini ndó ta xihín ña yóho cõ cúu ga ña cuéntá Jesucristo, xitoho í.

21 Jáchi tá ndíndaa hora cajíni ndó tá in tá in ndó sa jihna ñúhú ndo ndáva ndó cuahan ndó quehe ndó ña cajíni mé cuití ndo. Ta java ndó ni cõ ñehé ndó ña cuxu ndó. Joo java ndó xíhi ndó janda jáxini ndó mé ndó.

22 Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a váha cája ndó jáchi cõ ñehé na ndahví ña cuxu na cája ndó ta xihín ña yóho cácahan

nu ná. A cándati toho ndó ña cajji íní i xihín ña cája ndó yóho jáchi a juú ña vaha queá cája ndó.

Ña ndítahan caja na cúu cuénta Jesús tá xijini na ña yii cuénta Jesús

(Mt. 26:26-29; Mr. 14:22-25; Lc 22:14-20)

²³ Ña jánaha i nu ndo yóho cúu ña najánaha Jesucristo, xitoho í nuú i. Jáchi mé ñuu tá cámaní ndiquiahva na mé á ndáha na ihvi a já natiin a in pan.

²⁴ Tá nandihí nandiquiahva ndixahvi nu Ndióxi já nasahnda java ña ta já nacachi a já xihin ná: “Mé pan yóho cúu á tátuhun yiquí cuñu i ña ndiquiahva i saha mé ndó. Xíni ñúhú caja ndó ña yóho ña ná ndicuhun ini ndó ña naxihí i saha ndo”, nacachi Jesús.

²⁵ Ta tá nandihí naxijini na cán já natiin a in vaso nu ñúhu tó uva. Ta já nacachi a já: “Dó ñúhu ini vaso yóho cúu dó tátuhun níi i, dó cuíta saha ndó. Ta xihin dó yóho xinu coo nuú tuhun nasahan Ndióxi nuú ñayivi sanahá tá nacachi a jácacu a ñayivi. Ndijáa tañu tá ná coho ndó mé tó uva, dó yii ndítahan ndicuhun ini ndó ña naxihí i saha ndo”, nacachi Jesús.

²⁶ Sahá ña cán queá ndijáa tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naxihí Jesucristo, xitoho í saha ndo. Ta xíni ñúhú caja ndó ña janda quiahva ná quixi tucu mé á ñuyiví yóho.

²⁷ Candehé ndo. Tá ná cuxu ndó pan ta tá ná coho ndó tó uva, ña yii cuénta Jesucristo, xitoho í ta co íin vií ínimá ndo já queá cája ndó cuachi nu mé

á ta quéhe núu ndó ña naxihí a ndica crúxu saha ndo.

²⁸ Saha ña cán quéa tá cámani casahá cajíni ndó ña yíi cuéntá Jesús xíní ñúhú coto ndojó jihna ndó mé ndó á vií ínima ndo nu Ndióxi á coó vií a.

²⁹ Jáchi tá ná cuxu ndaja nacuu ndó ña yíi cuéntá Jesús já quéa náha ña quéhe núu ndó mé á. Jáchi ña xíxi ndó jan cúú á tátuhun yiquí cuñu mé á ta dó xíhi ndó jan cúú dó tátuhun ñii á. Ta tá ná quehe núu ndó ña já quixi ña ndoho ini ndó caja Ndióxi.

³⁰ Saha ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihí ná sahá ña naquehe núu na ña yíi cuéntá Jesús.

³¹ Joo tá ná coto ndojó yo mí ña á ín vií ínima yo nu Ndióxi já quéa a ndítahan toho nu mé a cúú xitoho í caja vií a sahá cuachi.

³² Joo tá jándoho mé á ini mí cúú á sahá ña co cúni a ña ná ndoho iní xihín ñayivi ñuyíví tá ná xinu coo quívi caja vií mé a cúú xitoho í sahá cuachi nacaja na cán.

³³ Candehé ndo, ñani i, na cúú cuéntá Jesús. Ña ndítahan caja ndó cúú ña yóho. Tá ná nditaca ndó cajíni ndó ña yíi cuéntá Jesús xíní ñúhú candati táhan ndó janda quiáhva ná taca tóco ndihi ndó.

³⁴ Ta tá cuíco ndó já quéa xíní ñúhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajíni ndó ña yíi jan. Ta caja vií i sahá java ga ñaha tá ná saa i coto nihni i ndohó jan.

12

Ña ñéhe táhvi ñayivi nu ínima yíi Ndióxi

¹ Candehé ndó, ñani i, na cúu cuéntá Jesús. Cáhyí i ña yóho nu ndo jáchi cúni ña ná candaꝯ ini ndó ndaja íin ña sáhan ínima yii Ndióxi nu yo.

² Mé ndó sa candaꝯ vaha ini ndó ña tá cámaní ndiquehe ndó íchi cuéntá Jesús já nasacuu ndó tátuhun ñayivi cuáá jáchi nasanduu ndó ndáha tá nuú yoco, ña coó tachi cáhan.

³ Ta viti cúni caxi tuhún i xihín ndo ña ni in ñayivi a cúu chicaꝯ na chahan jata Jesús tá ta ínima yii Ndióxi quéa sáhan tuhun nu ná cahan na. Ta tá cáchí na xihín ndinuhu ini na ña Jesús cúu xitoho na já quéa náha ña ínima yii Ndióxi quéa sáhan tuhun nu ná cahan na.

⁴ Cuahá nuú ñaha ñéhe táhvi ñayivi caja na cuéntá Ndióxi ta in túhún ínima yii Ndióxi sáhan ña nu ná.

⁵ Cuahá nuú chuun cuu caja ñayivi cuéntá Ndióxi ta tóco ndihí cája chúun í cuéntá mé a cúu xitoho í.

⁶ Ta sa jíin sa jíin cája in in í chuun nasahan Ndióxi nu yó caja í. Joo in túhún mé á quéa sáhan ña yóho nuú in in í caja í.

⁷ Ta sáhan Ndióxi in ñaha nuú in in í já náha ña ñúhu ínima yii Ndióxi iní ta xihín ña yóho cuu chindeé yo tóco ndihi na cúu cuéntá Jesús.

⁸ Ínima yii Ndióxi yóho quéa cája ña ná cuu candaꝯ ini java ñayivi ndaja íin ña vaha xihín ña a váha ta já ndicani na ña nuú ñayivi. Ta sa mé ínima yii Ndióxi quéa cája ña ná cuu cahan ñayivi ña ndíchí ndivaha.

⁹ Ta cája mé ínima yii Ndióxi yóho xihín java na ña ná candeé cáhnu iní na mé á. Ta sáhan mé ínima

yii Ndióxi nuú java na ña ná cuu ndaja vaha na na quíhvi.

¹⁰ Java na ñehe táhvi ná caja na ña xitúhún. Ta java na ñehe táhvi ná jáyaha na tuhun naçahan Ndióxi xihín ná nuú ñayivi. Ta java na ñehe táhvi ná ndicuni na ndá na cúu na cája chúun cuéntá ínimá yii Ndióxi ta ndá na co cája chúun toho cuéntá mé á. Ta java na ñehe táhvi ná çahan na tuhun ña coo naçatiahva na. Ta java na ñehe táhvi ná nducú ñehe na ña cúni cachi tuhun çahan na cán nuú ñayivi.

¹¹ Ta sa mé ínimá yii Ndióxi cája tóco ndihi ña yóho ta in túhún mé á sáhan nuú in in ñayivi ña sácú ini a caja chúun vaha na xihín.

In cúu tóco ndihi na cúu cuéntá Jesús sahá ña cándéé ini na mé á

¹² Candehé ndo. Cuahá ndivaha nu ndáca yiquí cuñu í joo in víxí cúu á. Quiahva já ín xihín na cúu cuéntá Jesús.

¹³ Ta quiahva já yáha xihín tóco ndihi mí, coo caja toho a á cúu yó na Israel á co cúu yó na Israel. Ta coo caja toho a á cúu yó na cómí in xitoho cuéntá saha, á cúu yó na xíca núná mé. Jáchi cája ínimá yii Ndióxi ña cúu yó tátuhun in víxí ñayivi sahá ña in nanduú xihín Jesucristo tá naçandúta yó cuéntá mé á. Ta in túhún ínimá yii mé á naçacu a ini ínimá in in í.

¹⁴ Xíní ñúhú ndicuhun iní ña a juú in víxí nu ndáca yiquí cuñu í jáchi cuahá ndivaha nu ndáca yiquí cuñu ñayivi.

¹⁵ Candehé ndo. Cúu á tátuhun tá ná çahan in xoo saha yo já cáchí a já: “Yehe co cúu toho i ndáha ñayivi sahá ña cán quéa coo chuun toho i nuú yiquí

cuñu na”, cáchí a. Joo cō cája toho ña cáhan saha yo yóho jáchi cúu á cuénta yiquí cuñu í.

16 Ta cúu á tátuhun tá ná cachi in johó í já cáchí a já: “Yehe cō cúu toho i nduchú núu ñayivi sahá ña cán quea cōo chuun toho i nuú yiquí cuñu na”, cáchí a. Joo cō cája toho ña cáhan johó í yóho jáchi cúu á cuénta yiquí cuñu í.

17 Jáchi caja mé ndó cuénta ndaja caja í cuni johó í tá ní cúu yiquí cuñu í ná cacuu a nduchú núu yo. Ta ndaja caja í tahmí ñaha tá ní cúu yiquí cuñu í ná cacuu a johó í.

18 Joo in in ña ndáca yiquí cuñu í yóho nasacu Ndióxi ña mé nu ndítahan coo a jáchi já nasacu ini a caja.

19 Xíní ñúhú caja ndó cuénta tá in víxi johó ná candaca ní cúu yiquí cuñu í já quea cō ín ndihi toho yiquí cuñu í.

20 Ta vatí cuahá ndivaha nu ndáca yiquí cuñu in in í joo in víxi cúu yiquí cuñu í. Ta quiahva já ín a xihín na cúu cuénta Jesús.

21 Candehé ndo jáchi sácú u in quiahva nu ndo: Nduchú núu yo a cúu cachi a xihín ndáha yo ña cō xíní ñúhú a ña. Ta ni yiquí jíní yo a cúu cachi a xihín saha yo ña cō xíní ñúhú a ña.

22 Ña yáha xihín yiquí cuñu í cúu ña yóho. Java tañu cáhan yo ña vitá in ñaha ndáca yiquí cuñu í joo ña jan xíní ñúhú chága yó ña.

23 Ta mé xoo yiquí cuñu í ña cáhan yo cōo cuahá saha, ña cō cúní yo ña ná candehé ñayivi, ña cán cúu ña chíjahví vaha í

24 vatí cō xíní ñúhú caja í já xihín ñaha ña cuu candehé ñayivi. Xihín ña yóho cuu candaa iní ndá

quiahva naçavaha Ndióxi in in xoo yiquí cuñu í ta cuu candaa ín ndaja candaa vaha chága yó ña cáhán yo coó cuahá saha.

25 Ta xihín ña yóho co sáhndá java táhan yiquí cuñu í jáchi in in xoo yiquí cuñu í ndíhi ini a sahá java ga xoo yiquí cuñu í.

26 Ña cán quéa tá ndícuehe in xoo yiquí cuñu í ndijáa java ga ña cán ndíhiví a sahá ña ndóho in xoo yiquí cuñu í. Joo tá víi cája na xihín in xoo yiquí cuñu í já quéa cájji ini java ga xoo yiquí cuñu í.

27 Ta tóco ndihi ndó, na cúu cuéntá Jesús cúu ndó tátuhun yiquí cuñu Jesucristo jáchi in nanduu ndihi ndó xihín á ta in in ndó cúu ndó tátuhun in xoo yiquí cuñu a.

28 Ta tá quiahva ín chuun cája in in xoo yiquí cuñu í quiahva já ín chuun caja in in na cúu cuéntá Jesús. Jihna ñuhú naçaxi Ndióxi na apóstol ta já naçaxi a na jáyaha tuhun Ndióxi nuú ñayivi ta já naçaxi a na jánaħa tuhun Ndióxi nuú ñayivi ta já naçaxi a na cája ña xitúhún. Ta já naçaxi a na ndája vaha na quíhvi xihín na chindeé ñayivi xihín na sáhndá chuun nuú java ga ñayivi xihín na cáhan tuhun ña coó nasatiahva na.

29 Joo a juú ndihi na cán cúu apóstol. Ta ni a juú ndihi na cúu ná na jáyaha tuhun cáhan Ndióxi nuú ñayivi. Ta ni a juú ndihi na jánaħa ñayivi. Ta ni a juú ndihi na cája ña xitúhún.

30 Ta ni a juú ndihi na ndája vaha na na quíhvi. Ta ni a juú ndihi na cáhan tuhun ña coó nasatiahva na. Ta ni a juú ndihi na tiaħva nducú ñehe ña cúni cachi tuhun cáhan na cán.

31 Joo mé ndó xíní ñuhú ndinducú ndo ña ná

quiahva Ndióxi in ña vaha chága nu ndo. Ta viti cúni jánaħa i ña cúu ña vaha chága nu ndo.

13

Ña ndítahan caja í tá quíhvi iní ñayivi

¹ Tá ná cuu caħan i tá nuú tuħun cáħan ñayivi ndúu ñuyiví yóho ta tá ná cuu caħan i tuħun cáħan tátō Ndióxi joo tá cō quíhvi iní i ñayivi já queá cōó saħa toho ña cáħan i. Jáchi xihín ña jan cúu u tátuhun in caa jácasá na, á tátuhun in caa xōō tá jácasá na ña. Quiaħva já ín i tá cō quíhvi iní i ñayivi.

² Ta ni cōó saħá ña ná cacuu u in da jáyaha tuħun cáħan Ndióxi nuú ñayivi tá cō quíhvi iní i ñani táhan i. Jáchi tá cō quíhvi iní i ñayivi cōó caja toho ña ná cuu candaa iní i tóco ndihi ñaha ta ni cōó caja toho a tá xini tóco ndihi ña xini da ndichí ta ni cōó saħa toho tá cándéé cáħnu ndivaha iní i Ndióxi janda quiaħva cuu caħan i xihín in yucu ña ná ndicanda ña. Cōó saħa toho tóco ndihi ña yóho tá cō quíhvi iní i ñani táhan i.

³ Ta vatí ná ndicahnda i tóco ndihi ña cómi i ta já quiaħva i ña nuú na ndahví cōó saħá toho ña cája i tá cō quíhvi iní i ñayivi. Ta ni cōó caja toho ña ná ndiquiaħva i yiquí cuñu i ña ná cayi a saħá ña cáħan i tuħun Ndióxi tá cō quíhvi iní i ñayivi.

⁴ Jáchi tá mé a ndaa táhyí quíhvi iní ñayivi cō ndíhi iní xihín ná. Ta tá quíhvi iní na táhvi iní saħa ná ta cō cáhivhi toho iní xihín ná. Ta ni cō cája lándā yo nu ná ta ni cō cája cáħnu í mí nu ná.

⁵ Tá quíhvi iní ñayivi ín toní ñúhú yo xihín ná ta cō cájihnda yó ñaha nu ná jáchi cō ndúcú yo ña vaha mé cuití yo. Ta ni cō xójo iní xihín ná. Ta ni cō

quéhé cuéntá sahá ña núu cája na xihin yo tá quíhvi iní na.

⁶ Tá tá quíhvi iní ñayivi co cájji toho iní tá cája núu na joo cájji iní tá cája na ña ndaa.

⁷ Tá quíhvi iní ñayivi íin tiahva í ndoho iní saha ná ta cáhvi iní ña vaha cuití va saha ná. Ta cándúsa í ña cája na ña ndaa. Ta sahan ndeé iní xihin tóco ndihi ñaha.

⁸ Tá mé a ndaa quíhvi iní ñani táhan í já quéa anda ama cáa quiví a ndíhi sahá ña quíhvi iní na. Joo vaxi quiví a jáyaha ga ñayivi tuhun cáhan Ndióxi xihin ná nuú ñayivi jáchi vaxi quiví ndihi sahá. Ta a cáhan ga na tuhun ña coó nasatiahva na. Ta vaxi quiví ndihi sahá ña ndíchi jini ñayivi. Joo a ndíhi toho saha ña quíhvi iní táhan í.

⁹ Jáchi chá cuití xini yó saha Ndióxi ta chá cuití tiahva í jáyaha í tuhun cáhan Ndióxi nuú ñayivi.

¹⁰ Joo tá ná xinu coo quiví ndaja Ndióxi ña ná nduú ñayivi vii já quéa a cúní ñuhú ga yó ña tóco ndihi java ga ña ndihi saha cán jáchi sa nanduú ñayivi vii nu mé á.

¹¹ Candehé ndo. Tá nasacuu u in taa loho nacahan i tá quiahva cáhan na valí ta quiahva já nacahvi ini i ta quiahva já nacaja i. Joo tá nasahnu i najandacoo i ña cája na valí.

¹² Viti co cándaa vaha iní ndá quiahva cáa Ndióxi. Cúu á tátuhun tá sándehe yo nuú in yutátá ña co jíñu vaha ga. Joo vaxi quiví cuní mé á tá quiahva cáa. Viti cuahá ñaha co cándaa iní saha mé á. Joo vaxi quiví candaa iní saha mé á tá quiahva xini mé á mí viti.

¹³ Ín uní nuú ñaha ña a ndíhi sahá. Ta ña yóho cúu á: ña cándéé iní Ndióxi, ta inga cúu ña ndátí

casaa, ta inga cúú ña quíhvi iní Ndióxi xihín ñani táhan í. Ta cúni Ndióxi ña ná caja í ndihuni ña yóho joo ña cáhnu chága cúú ña quíhvi iní Ndióxi xihín ñani táhan í.

14

Tá cáhan ñayivi tūhun ña coó ñacatiahva na

¹ Xíní ñúhú ndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínimá yíi Ndióxi nu yo. Ña xíní ñúhú ndíhi chága ini ndó ndinducú ndo cúú ña ná cuu jáyaha ndó tūhun cáhan Ndióxi xihín ndó nuú ñayivi.

² Jáchí ndá na ñacuu cáhan tūhun ña coó ñacatiahva na já quéa cáhan na xihín Ndióxi joo co cáhan na xihín ñayivi jáchí co cándaá ini ñayivi ña cáhan na. Ña cáhan na cúú ña ñaquixi cuéntá ínimá yíi Ndióxi ta cúú á ña co xíní ndíhi ga ñayivi.

³ Joo ñayivi tiahva jáyaha tūhun cáhan Ndióxi xihín ná nuú ñayivi cája na ña ná cuu cuahnu chága na cúú cuéntá Jesús xihín tūhun cáhan Ndióxi. Ta sáhan na tūhun ndeé ini ñayivi ta quiahva já jáxinu chága na ini na cán.

⁴ Ta na ñéhe táhvi cáhan tūhun ña coó ñacatiahva na sáhnu mé cuití va na xihín tūhun sáhan Ndióxi nu ná cahan na. Joo na tiahva jáyaha tūhun cáhan Ndióxi nuú ñayivi chindeé na na cúú cuéntá Jesús ña ná cuahnu chága na xihín ñaha cuéntá Ndióxi.

⁵ Mí í cájii iní í tá ná cuu cahan ndíhi ndó tūhun ña coó ñacatiahva ndó. Joo cájii chága ini í tá ná jáyaha ndó tūhun cáhan Ndióxi xihín ndó nuú ñayivi jáchí xíní ñúhú chága ña yóho a juú ga ña ná cahan ndó tūhun ña coó ñacatiahva ndó. Vaha cája

ndó ña ná cahan ndó tuhun ña coó nacatiahva ndó tá íin in na tiahva nducú ñehe ña cuni cachi tuhun cahan ndo nuú ñayivi já quea ná cuu cuahnu na cúu cuénta Jesús xihin mé tuhun cán.

⁶ Xíni ñuhú candehé vaha ndó ña cahan i xihin ndo, ñani mí i na cúu cuénta Jesús. Coó saha toho ña caha i tá ná saa i coto nihni i ndohó ta já casaha i cahan i inga tuhun ña co candaa ini ndó. Tá ná caha i já ndaja caha ndó candaa ini ndó tuhun Ndióxi. Ña ndítahan caha i quea cahan i xihin ndo ña najánaha Ndióxi nuú i. Ta ndítahan cahan i ña ndichí cuénta Ndióxi. Ta ndítahan cahan i tuhun nasahan Ndióxi nuú i jáyaha i ña nu ndo. Ta ndítahan jánaha i ña ndaa cuénta Ndióxi nu ndo.

⁷ Sácú u in quiahva nu ndó saha in tóyo xihin dó jácaha. Ndaja caha ñayivi candaa ini na ndá yaa tívi yo tá co tiáhva í tívi vaha í, á tá co tiáhva í jácaha vaha í.

⁸ Ta ndaja caha na soldado cacu tiahva na mé ná ña ná cahun na cani táhan na tá ta co tiáhva vaha da tívi trompeta tívi da do.

⁹ Quiahva já yaha ri xihin mé ndó jáchi tá co cahan ndó tuhun ña cuu candaa ini ñayivi ndaja caha ri na cán candaa ini na ña cáchi ndo. Cúu á tátuhun cahan ndó nu táchi cuití va.

¹⁰ Caha i cuénta íin cuaha ndivaha nuú tuhun cahan ñayivi ndijáa ñuyívi. Joo ndijáa tuhun yóho cáxi cahan nuú ñayivi cahan na mé tuhun yóho.

¹¹ Joo tá co candaa ini i ña cahan inga ñayivi xihin i já cúu u tátuhun in da tóho nu mé ná. Ta na cán cacuu na tátuhun in na tóho nu mí i saha ña co candaa ini i tuhun cahan na.

¹² Saha ña cán quea tá mé a ndaa cuni ndó

ndiquehe ndó ña sáhan ínimá yíi Ndióxi nu ndo já quéa xíní ñúhú ndinducú ndó ña ná cuu chindeé ndó na cúu cuéntá Jesús ná cuahnu chága na xihín tuhun Ndióxi.

13 Ña cán quéa ndá ndó ñehe táhvi cáhan ndó tuhun ña coó ñacatiáhva ndó já quéa xíní ñúhú caca ndó nu Ndióxi ña ná cuu ndicani ndó ña cúní cachi a nuú ñayivi.

14 Jáchi tá ná casáhá cáhan i tuhun ña coó ñacatiáhva i nani xíca tahví i nu Ndióxi já quéa mé a ndaa cája cáhnu i Ndióxi xihín ínimá i joo co cája i ña xihín xíní túní i jáchi co cándaá ini i ña cáhan i.

15 Ndía caja i. Ña xíní ñúhú caja i quéa caca tahví i nu Ndióxi xihín ínimá i ta xihín xíní túní i. Ta quiáhva já xíní ñúhú cata i xihín ínimá i ta xihín xíní túní i viti.

16 Candehé ndó. Ná caja í cuéntá tá ndúu ndó veñuhu ta casáhá ndo cáhan ndó tuhun ña coó ñacatiáhva ndó nani cája cáhnu ndó Ndióxi xihín ínimá ndo ta ndaja coo quíhvi in ñayivi ini veñuhu, na co cándaá cuahá ini sahá ñaha cuéntá Ndióxi. Ta xíní johó na ña cáhan ndo joo a cúu caja na ndiquiahva na ndixahvi nu Ndióxi in nuú xihín ndo jáchi co cándaá ini na tuhun cáhan ndo.

17 Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaá ini na tuhun cáhan ndo.

18 Ndiquiahva i ndixahvi nu Ndióxi jáchi cáhan cuaha chága i tuhun ña coó nasatiáhva i a juú ga ndóhó.

19 Joo nani jánaha i ndohó ini veñuhu cájii chága íni i cáhan chá cuití va i tuhun já ná cuu cándaá

cáxí ini ndó ña cáhan i. Jáchi ndá chuun quéa ná cáhan cuahá nahá i tuhun ña co cándaá ini ndó.

²⁰ Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na co cája cuachi.

²¹ Xíní ñúhú ndicuhun ini ndó ndaja cáchi ley nacahyi Moisés sanahá tá nacachi Ndióxi já: “Vatí ná chindahá i na cáhan java tuhun tóho nuú ñayivi Israel joo a cuni johó na nuú cahán na tóho cán jáchi sáá ini na Israel”, nacachi Ndióxi.

²² Tá cáhan ndó tuhun ña coó nasatiahva ndó nani cája cáhnu ndó Ndióxi co chindeé cuahá ña yóho na cúu cuéntá Jesús cuahnu na xihín tuhun Ndióxi vatí mé a ndaa na co xíní tuhun Ndióxi catóntó na xihín ña yóho. Joo tá jáyaha ndó tuhun cáhan Ndióxi xihín ndó nuú na cúu cuéntá Jesús já cuu cuahnu chága na xihín tuhun Ndióxi vatí co chindeé cuahá ña yóho na cámaní ndihvi íchi cuéntá Jesús.

²³ Caja mé ndó cuéntá tá ná taca cuahá na cúu cuéntá Jesús ta casahá cáhan ndo tuhun ña coó nasatiahva ndó nani cája cáhnu ndó Ndióxi ta ndaja coo quíhvi na co xíní tuhun Ndióxi nu ndúu ndó jan. Ta tá ná cuni na ña sa jíin tuhun cáhan ndihi ndó já quéa cahán na ña cúu ndó na tachí.

²⁴ Joo tá ná jáyaha tóco ndihi ndó tuhun cáhan Ndióxi nuú ñayivi ta ndaja coo quíhvi in na co xíní tuhun Ndióxi. Ta tá ná cuni johó na ña cáhan ndo já quéa tahnda ini na sahá cuachi na ta já casahá ndícani ini na sahá ña núu cája na.

²⁵ Ta já nahma na cuachi na nuú ñayivi ta já

ndicava xítí na caja cáhnu na Ndióxi. Ta xihín ña yóho candaa ini na ña mé a ndaa táhyí ín Ndióxi tañu ndó.

*Tóco ndihi ña caja ndó cuéntá Ndióxi xíní ñúhú
caja ndó ña xihín toní ñúhú*

²⁶ Candehé ndó, ñani i, na cúu cuéntá Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaḥa ndó nuú ñayivi. Ta ndítahan nuú java ndó jáyaha ndó tuhun cáhan Ndióxi xihín ndó nuú ñayivi ta java ndó cahan ndó tuhun ña coó nacatiahva ndó. Ta ndítahan nuú java ndó nducú ñehe ndó ña cúní cachi tuhun cáhan na cán. Tóco ndihi ña caja ndó xíní ñúhú chindeé a ndohó ná cuahnu chága ndó xihín tuhun Ndióxi.

²⁷ Ta ndítahan nuú ivi á uní ñayivi cuití va cahan na tuhun ña coó nacatiahva na. Joo tá in tá in na caja na ña. Ta ndítahan canduu na tiaḥva nducú ñehe na ña cúní cachi tuhun cáhan na jan.

²⁸ Ta nu táca ndo tá coó ni in na tiaḥva nducú ñehe ña cúní cachi tuhun cáhan na jan já quéa vaha chága ná a cáhan na tuhun ña coó nacatiahva na. Ña vaha chága quéa ná cahan yaá na ña ná cuni johó mé ná xihín Ndióxi cuití va.

²⁹ Ta quiahva já tá jáyaha na tuhun cáhan Ndióxi xihín ná nuú ñayivi ná cahan ivi á uní na cuití va. Ta xíní ñúhú cahan na nani ndúu tútú java ga na veñuhu sándehe na á mé a ndaa cáhan na cuéntá Ndióxi.

³⁰ Caja i cuéntá nani jáyaha in na tuhun cáhan Ndióxi xihín ná nuú ñayivi ta jácahan Ndióxi ini inga na ña ná jáyaha na tuhun cáhan Ndióxi xihín

na nuú ñayivi já quéa xíní ñúhú cacoo na nu cuítí cán.

³¹ Xihín ña yóho tá in tá in ndó cuu jáyaha ndó tuhun cáhan Ndióxi xihín ndó nuú ñayivi. Já cuu catiahva na xíní joho ña yóho ña ná ndindeé chága ini na xihín tuhun Ndióxi.

³² Na jáyaha tuhun Ndióxi nuú ñayivi xíní ñúhú cañehe na quiahva xihín ña cája na nani ndáti na jáyaha na tuhun cán.

³³ Jáchi cúni Ndióxi ña ná coo vaha ini caja í tóco ndihi ñaha ta ná a jána í nuú cája í ña.

Ta cáji ini mé á tá cája vaha ndó tá quiahva cája java ga na cúu cuéntá Jesús ndúu ndijáá ga ñuu.

³⁴ Nani táca ndo veñuhu co ndítahan nuú najihí cahan na jáchi co cáni a nu ná cahan na. Ta co ndítahan nu ná cacomí na cuéntá sahá na veñuhu jáchi quiahva já sáhdá ley Moisés.

³⁵ Ta tá cúni na candaá ini na sahá ña jánaha na veñuhu xíní ñúhú ndaca tuhún na yíi ná sahá tá cása na vehe na. Jáchi co náha vaha tá cáhan in ñáñáha nani táca na veñuhu.

³⁶ Xíní ñúhú ndicuhun ini ndó ña a juú ndóhó cúu na nandiquehe tuhun Ndióxi nu cuítí. Ta a juú ndóhó cuítí xíní tuhun Ndióxi, vaha.

³⁷ Ta ndá na cáhan ña nachutú ndaa ínima ná xihín ínima yíi Ndióxi ña ná jáyaha na tuhun cáhan Ndióxi xihín ná nuú ñayivi, mé na cán ndítahan nu ná ndicuni na ña cáhan i ña sáhdá Ndióxi nuú i cahan i.

³⁸ Joo tá co cúni na cán cuni joho na ña cáhan i cuéntá Ndióxi já quéa a cúni joho ndó ña cáhan na cán.

³⁹ Candehé ndo, ñani i, na cúu cuéntá Jesús. Xíní ñúhú ndihi ini ndó nducú ndó ña ná jáyaha ndó tuhun cáhan Ndióxi xihín ndó nuú ñayivi. Ta a cájí nuu ndó nuú na cúu cuéntá Jesús tá ñehe táhvi ná nu Ndióxi cahan na tuhun ña coo nasatiahva na.

⁴⁰ Joo tóco ndihi ña cája ndó xíní ñúhú caja ndó ña xihín toní ñúhú já ná a jána ndó nu cája ndó ña.

15

Ndicani Pablo sahá quivi tá nanditacu Jesús

¹ Candehé ndó, ñani i, na cúu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánaha i nu ndo. Mé tuhun vaha yóho sa nandiquehe vaha ndó ña ta cándéé vaha ini ndó a janda viti.

² Ta jivi saha mé tuhun vaha najánaha i nu ndo yóho cuu cacu ndaa ínimá ndo tá ná caja ndó ña najánaha i nu ndo xihín ndinuhu ini ndó. Joo tá ná a cája ndó ña já quéa mé a uun va quéa nacandúsa ndó ña.

³ Candehé ndó. Ña jihna ñúhú nacaja i quéa najánaha i ndohó ña nacatiahva mí i cuéntá Jesucristo, mé á naxihi ndica crúxu sahá cuachí tá quiahva cáchí tuhun Ndióxi.

⁴ Ta najánaha i ndohó ña najánduxu na mé á joo tá naxinu quivi uní já nanditacu tucu a tá quiahva cáchí tuhun Ndióxi coo.

⁵ Ta já nanaha mé á nu Pedro xihín nuú java ga táhan da uxu ivi naxica tuun xihín a cán.

⁶ Ta tá nandihí já nanaha mé á nu yáha ga nuú uhun ciento na cúu cuéntá mé á. Ta in naxini tocó ndihi na mé á. Ta cuaha táhan na naxini ñahá cán tácu yii va na vatí java na sa naxihí na.

⁷ Ta tá nandihí já nanaha mé á nu Jacobo ta anda já nanaha mé á nu tóco ndihi na naxica tuun xihin á.

⁸ Ta tá nu ndíhí já nanaha ri Jesús mé á nuú i vatí cúu u da nacacu tá sa nayaha mé tiempo tá naxica nuu Jesús ñuyíví yóho.

⁹ Yehe cúu u in apóstol joo ín chága saha tóco ndihi java ga na apóstol a juú ga yehe. Ta ni coó sahá i cahan na apóstol xihin i jáchi naxica nuu i nacaja xíxi i xihin na cúu cuéntá Ndióxi jihna.

¹⁰ Joo mé a ndaa cúu u in apóstol jáchi nacamáni Ndióxi yehe. Ta a juú ña uun cúu ñamaní nacaja Ndióxi xihin i jáchi cuahá ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihin ndée mí i. Sahá ña táhvi ini Ndióxi sahá i sahá ña cán quéa chindeé a yehe cája i chuun mé á yóho.

¹¹ Joo co cája toho a á yehe á na java apóstol cán cája chúun chága. Ña vaha quéa tóco ndihi nde jánaha nde sahá Jesucristo ta mé ndó sa nacandúsa ndó ña najánaha nde nu ndo.

Vaxi quivi nditacu tóco ndihi ndii

¹² Tá nacahan nde tuhun Ndióxi xihin ndo najánaha nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co ndítacu toho na sa naxihi.

¹³ Joo tá cáchí ndo ña co ndítacu toho na sa naxihi cúu á tátuhun co cándúsa ndó ña nanditacu tucu Jesucristo.

¹⁴ Ta tá co cándúsa ndó ña nanditacu tucu Jesucristo já quéa coó saha toho tuhun Ndióxi ña xíca

nde jánaha nde nuú ñayivi. Ta xihín ña yóho mé a uun va cándéé ini ndó mé á.

¹⁵ Ta tá mé a ndaa coó nanditacu Jesucristo já quéa cúu nde na cáhan ña tuhún saha Ndióxi jáchi cáchi nde xihín ndo ña mé Ndióxi najánditacu a Jesucristo. Joo tá co ndítacu toho ndii ta ndehe cáchi nde ña nanditacu Jesucristo já quéa cúu nde na tuhún.

¹⁶ Jáchi tá co ndítacu ndii já quéa cúni cachi a ña coó nanditacu toho Jesucristo.

¹⁷ Ta tá coó nanditacu Jesucristo já quéa coó saha toho ña cándéé ini ndó mé á ta cómi yii va cuachi cuénta saha ndó.

¹⁸ Ta xihín ña yóho cúni cachi a ña a cácu ndaa toho ínimá na cúu cuénta Jesús tá ná quivi na.

¹⁹ Tá ndíyahvi ña cúu yó cuénta Jesús nani tácu yo ñuyívi yóho cuití va já quéa ndáhvi nahá nacuú.

²⁰ Joo mé a ndaa nanditacu ndusa Jesucristo. Ta mé á cúu á ña nu cuití nanditacu. Ta vaxi quívi nditacu tóco ndihi yó, na cúu cuénta mé á.

²¹ Candehé ndo. Naquihvi cuachi ñuyívi sahá ña nacija Adán, da nasacuu ta n nu cuití ta sahá cuachi yóho nacasáhá xihí ñayivi. Ta jivi sahá ña nacija Jesucristo tá naxihí a ndica crúxu cuu nditacu tóco ndihi na sa naxihí.

²² Xihí ñayivi sahá ña naquixi na chichi Adán ta cája na ña núu tá quiahva nacija Adán sanahá. Ta víti sahá ña cúu yó cuénta Jesucristo catacú anda ama cáa quívi sahá ña nacija mé á.

²³ Ta tá ná ndindaa nuú in in na nditacu na já nditacu na caja Ndióxi. Mé Jesucristo quéa nanditacu nu cuití. Ta tá ná ndicó coo tucu mé á ñuyívi yóho já caja mé á ña ná nditacu tóco ndihi

na cúu cuéntá mé á.

²⁴ Anda já ndihi saha tóco ndihi ñaha ñuyívi yóho jáchi jándihi Jesucristo saha tóco ndihi na cómi cuéntá sahá ñayivi ñuyívi yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá saha ná.

²⁵ Jáchi Jesucristo quéa ndítahan nu cacomí cuéntá sahá na cúu cuéntá mé á janda quiahva ná xinu co quívi jándihi Ndióxi saha tóco ndihi na co cúní ñahá.

²⁶ Ta janda nu ndíhí jándihi mé á sahá ña ná quivi ñayivi. Ta xihín ña yóho a quívi ga ñayivi.

²⁷ Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchí tuhun Ndióxi ña cómi Jesucristo cuéntá saha tóco ndihi ñaha, co cúní cachi a ña cómi a cuéntá saha Ndióxi vití jáchi mé Ndióxi quéa nandiquiahva tóco ndihi ñaha ndáha mé á ña ná cacomí a cuéntá sahá.

²⁸ Ta tá sa cómi Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in túhún jiní já jahyi Ndióxi ta mé Ndióxi quéa nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

²⁹ Ndúu java ñayivi ta cándúta ná sahá na sa naxihí já ná cacu ndaa ínima ná. Joo cáchí na co cándúsa toho na ña ndítacu ndii. Ta ndá sahá quéa cája na já tá co cándúsa na nditacu ndii. Joo xíní vaha í ña nditacu ndii.

³⁰ Ndá chuun quéa chícaan yo mí ndijáá níi quívi nuú tondóhó nuú cuu cahní na mí tá co cándúsa í ña nditacu tucu ndii.

³¹ Candehé ndo, ñani i, na cúu cuéntá Jesús. Ndijáá ní quivi vaxi tondóhó nuú i. Ta jalóho cúni quivi i. Mé ndó cándaá vaha ini ndó ña cáji ini i sahá in nanduu ndó xihín Jesucristo, xitoho í. Sahá ña cán queá ndítahan nu ndo candúsa ndó ña cáhan i xihin ndo.

³² Cuahá tañu naquihvi táhan i xihín ñayivi quini ñuu Efeso. Mé na cán cúu ná tátuhun quití yúcu. Joo coo saha toho ña ndóho ini i yóho tá mé a ndaa co ndítacu toho ndii. Jáchí tá co ndítacu toho ndii já queá cuu cohó caja í tá quiahva cáchí java ñayivi tá cáchí na já: “Cóho cuxu vaha í ta coho vaha í jáchí yó quivi itaan á iajá cúu yó.”

³³ A quiahva ndó ñamaní jándahvi inga na ndohó. Xíní ñúhú ndicuhun ini ndó in tuhun ña cáchí já: “Tá catáhan í xihín ñayivi, na co cája vaha já queá játiví na mí.”

³⁴ Xíní ñúhú ndicaxí vaha ini ndó ta a cája ndó cuachi jáchí ndúu java ndó ta co xini toho ndó Ndióxi. Cáhan i ña yóho xihin ndo já ná cacahan nuu ndo sahá ña núu cája ndó.

Ndaja coo tá ná nditacu ndii

³⁵ Cája i cuéntá ña ndúu java ndó ta ndícani ini ndó já cáhan ndo já: “Ndaja caja Ndióxi jánditacu a na sa naxihi. Ndá yiquí cuñu ndiquehe na caja Ndióxi.” Já ndáca tuhún java ndó ndícani ini ndó.

³⁶ Joo ña ndícani ini ndó saha jan cúu á ña tóntó ndivaha. Xíní ñúhú candehé ndo ndá quiahva yáha xihín in tata tá chíhin na ña. Mé tata yóho xíní ñúhú quivi a já ná nduta utu loho nu á.

37 Tá xútu ñayivi, cō xútu toho na in yucu. Ña xútu na cúu mé tata ta cō cája toho a á cúu á trigo á inga nuú tata.

38 Ta mé Ndióxi quéa cája ña ná ñehe táhvi in in a cán ndá quiahva coo a ta ndá javí cañehe in in a.

39 Ta a juú in javí ñehe tóco ndihi ñaha. Sa jín sa jín javí in in a. Tátuhun yiquí cuñu in dataa, sa jín ín yiquí cuñu da xihín yiquí cuñu quíti. Ta yiquí cuñu laa sa jín ín a xihín yiquí cuñu tiyacá. Sa jín nacaja Ndióxi xihín in in ña nacavaha mé á.

40 Ta quiahva já nacavaha Ndióxi ña ndúu indivi ta jín va ndáa a. Ta jín yiquí cuñu ñayivi ñuyíví yóho. Ta sa jín quiahva ndató ña ín indivi ta sa jín quiahva ndató ña ín ñuyíví.

41 Jín nacaja Ndióxi ña ná yehe candii ta jín nacaja mé á ña ná yehe yoo. Ta jín nacaja mé á ña ná yehe quimi ta ín java quimi sa jín sa jín yehe rí nuú inga rí.

42 Quiahva já yaha ri xihín ñayivi tá ná xinu coo quiví jánditacu Ndióxi na. Jáchi yiquí cuñu yó ña jánduxu na tixi ñúhu cúu á ña ndihi saha. Joo tá ná nditacu tucú já a ndíhi ga saha yo anda ama cáa quivi.

43 Mé yiquí cuñu í jánduxu na tixi ñúhu yóho cúu á tátuhun in ña núu ndivaha jáchi ndihi sahá. Joo tá ná xinu coo quiví ndicoo tucu a caja Ndióxi já cacuu a ña ndató ndivaha jáchi a ndíhi sahá. Ña jánduxu na tixi ñúhu cúu á ña vitá ndivaha joo ña nditacu tucu cacuu a ña ndacú vaha.

44 Jáchi tá ná jánduxu na mí tixi ñúhu, ña jánduxu na cúu yiquí cuñu cuéntá ñuyíví yóho. Joo tá ná nditacu tucú já ñehe yó inga yiquí cuñu, ña cúu

cuéntá indiví. Jáchí tá ín yiquí cuñu cuéntá ñuyíví, ña ndíhi saha ta já ín ri yiquí cuñu cuéntá indiví, ña a cuú ndíhi saha.

⁴⁵ Cáchí tuhun Ndióxi ña tá nacavaha Ndióxi Adán, da nasacuu ta nū cuítí já nacaja mé á ña ná catacu da. Joo cáhnu chága Jesucristo a juú ga Adán jáchi mé á cája ña ná catacu ñayivi anda ama cáa quívi.

⁴⁶ Ña jihna ñúhú sáhan Ndióxi nū yō cúu yiquí cuñu í, ña ndíhi yachi saha. Ta tá nū ndíhí já sáhan mé á inga yiquí cuñu nū yō cuéntá indiví ta ña cán cúu á ña cō ndíhi saha.

⁴⁷ Mé Adán, da nacavaha Ndióxi nū cuítí nasacuu da da nacavaha mé á xihín ñundáhyi ta cúu dá da ñuyíví yóho. Ta Jesucristo, xitoho í, cúu á inga táhan dataa joo cúu á ña naquixi chí indiví.

⁴⁸ Tá in tá in ñayivi ñéhe na yiquí cuñu tátuhun yiquí cuñu Adán jáchi cúu á ña nacavaha Ndióxi xihín ñundáhyi. Joo ñayivi, na ndíquiahva mé ndáha Jesucristo vaxi quívi ndiquehe na inga yiquí cuñu cuéntá indiví, ña cō ndíhi saha.

⁴⁹ Ta viti ín yiquí cuñu í tátuhun yiquí cuñu Adán joo vaxi quívi ndiquehé inga yiquí cuñu í cuéntá indiví ta cacuu a tátuhun yiquí cuñu Jesucristo.

⁵⁰ Candehé ndo, ñani i, na cúu cuéntá Jesús. Cúni caxi tuhun i xihín ndo ña a cúu toho cūhun yiquí cuñu í yóho indiví ña ná cacomí Ndióxi cuéntá sahá jáchi mé yiquí cuñu í yóho cō cúu á ña cuu catacu anda ama cáa quívi. Joo ña inga, ña quiahva mé á nū yō cán, a ndíhi toho sahá.

⁵¹ Ta viti cúni caxi tuhun i nū ndo sahá in ñaha nasahin jehé nuú ñayivi ta ña yóho quéa: A juú

ndihi toho í quiví jáchi tá ná xinu coo quiví quixi tucu Jesucristo ñuyíví yóho anda jáví ndijama ndihí tá quiahva ndáa í ta mé Ndióxi quiahva inga yiquí cuñu nu yo.

⁵² Ta in náá cuití yaha ña yóho jáchi cacuu a tátuhun in ndicuaní nuu yo ta já ndahyi trompeta, mé dó ndahyi nu ndihí cuí cán já nditacu tóco ndihi na sa naxihí ta a ndícó coo ga na quivi na. Ta mí, tá tácu yo, ña caja Ndióxi xihin yo quea ndijama yiquí cuñu í.

⁵³ Jáchi mé yiquí cuñu í ña ndihi saha yóho a cuú toho nduu a tátuhun yiquí cuñu ña quiahva Ndióxi nu yo. Sahá ña cán quea xíní ñúhú ndijama mé á yiquí cuñu í yóho já ná cuu cohó coo í xihin mé á anda ama cáa quivi.

⁵⁴ Ta tá sa nandijama yiquí cuñu í ta nanduu a ña co ndihi saha anda ama cáa quivi já quea xinu coo nuú tuhun ña nacachi na profeta sanahá: “Vaxi quiví ndihi sahá ña xihí ñayivi jáchi nacandeeé Jesucristo nasahnu a nuú ña xihí na.

⁵⁵ Ta xihin ña yóho cája cáhnu í mé á jáchi a quiví ga ñayivi sahá ña naquee vaha Jesucristo”, cáchí tuhun Ndióxi.

⁵⁶ Tá cája ñayivi cuachi já quivi tá quivi na sahá ña cája na. Ta cuú á tátuhun tá tíin líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quivi ñayivi sahá cuachi na jáchi ñéhe íni cuachi caja ña ná quivi ñayivi.

⁵⁷ Joo ndixahvi Ndióxi jáchi chindee a mí ña ná cuu quee vaha í sahá ña nacaja Jesucristo, xitoho í saha yo.

58 Sahá ña cán quéa ndítahan nu ndó, ñani máni i, na cúu cuénta Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándéé ini ndó mé á. Ta ndítahan nu ndó ndihi ini ndó caja chúun ndó cuénta mé á jáchi sa cándaá vaha ini ndó ña a juú ña uun cúu toho chuun cája ndó jáchi ín Jesucristo, xitoho í xihín ndo.

16

Tá ndítaca jiuhún ña jasá na nuú na cúu cuénta Jesús

¹ Ta viti cúni ndicani i nu ndo ndá quiahva ndítahan caja ndó tá jánditaca ndó jiuhún ña jasá ndo nuú na cúu cuénta Jesús ndúu ñuu Jerusalén. Xíní ñúhú caja ndó tá quiahva najánaña i nuú na cúu cuénta Jesús ndúu estado Galacia.

² Ña ndítahan caja ndó quéa: tá in in domingo xíní ñúhú tavá xóo ndó táhan jiuhún ña sácú ini ndó jasá ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa i jan jáchi xíní ñúhú jánditaca cuéé ndó ña.

³ Ta caxi mé ndó ndá na cúni ndó cañehe jiuhún jan ñuu Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihín ná ña ná quiahva na ña xihín jiuhún jan nuú na cúu cuénta Jesús ndúu mé cán.

⁴ Ta tá cúni Ndióxi já cuhun ri yehe va xihín na jan anda ñuu Jerusalén.

Sácú ini Pablo cuhun da coto nihni da na cúu cuénta Jesús ndúu java ga ñuu

⁵ Saa i coto nihni i ndohó cúnj. Joo jihna ñúhú yaha i coto nihni i na cúu cuéntá Jesús ndúu estado Macedonia. Ta anda jáví saa i ñuu Corinto jan.

⁶ Ta tá cúnj Ndióxi candoo nahá chá i xihin ndo. Á tá coo ta coo i níi tiempo vixi xihin ndó jan. Ta tá sa ná quee e cuhun i inga ñuu já cuu chindeé ndó yehe.

⁷ Co cúnj toho i coto nihni númí i ndohó. Ña cúnj quéa candoo too i coo nahá chá i xihin ndo jan tá cúnj Ndióxi.

⁸ Joo candoo too i coo i ñuu Efeso yóho janda quiahva ná yaha vicó Pentecostés.

⁹ Jáchi mé a ndaa núná nuú i cája chúun i cuéntá Ndióxi yóho jáchi cuahá ndivaha na ndíquehe vaha na tuhun Ndióxi vatí ndúu cuahá na co cúnj yehe sahá chuun cája i yóho.

¹⁰ Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajii íni da coo da xihin ndo. Jáchi cája chúun da cuéntá Jesucristo, xitoho í tá quiahva cája chúun yehe.

¹¹ A cándají ndó da. Ña ndítahan caja ndó quéa chindeé ndó da já ná coo vaha ini da quixi da nuú i. Jáchi yehe xihín java ga na cúu cuéntá Jesús ndáti nde xinu coo da nu ndúu nde yóho.

¹² Ta viti cúnj ndicani loho i nu ndó sahá ñaní, da naní Apolos. Mí i naxica tahví ndivaha i nu dá ña ná saa da xihín java ga na cúu cuéntá Jesús coto nihni da ndohó. Joo co cúnj da caja da ña viti. Cája i cuéntá tá ná nuná nu dá já saa da coto nihni da ndohó.

Ndíndayí Pablo na cúu cuéntá Jesús ndúu ñuu Corinto

¹³ Cuéntá vaha coo ndó. Xíní ñúhú ndacú coo ini ndó jáchi cándeé ini ndó Jesús. A yíhvi toho ndó. Canduu ndacú ndó íchi cuéntá Jesús.

¹⁴ Xíní ñúhú caja ndó tóco ndihi ñaha sahá ña quíhvi ini ndó ñani táhan ndó.

¹⁵ Candehé ndo ñani i, na cúu cuéntá Jesús. Sa xíní vaha ndó sahá na vehe Estéfanas, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé na na cúu cuéntá Jesús.

¹⁶ Ña cúní caça i nu ndo cúu ña ná cuni johu ndó ña sáhdá na cán nu ndó caja ndó. Ta xíní ñúhú caja ndó tá quiahva cúní ndihi na cán jáchi chindeé na ñayivi ta cája chúun vaha na cuéntá Jesús.

¹⁷ Cájji ini i jáchi naxinu coo Estéfanas xihín Fortunato xihín Acaico nu ín i ta nachindeé na yehe. Ta vatí a cúu quixi mé ndó nuú i

¹⁸ joo na yóho sáhan na tuhun ndéé ini i xihín ñaha cuéntá Ndióxi tá quiahva nacija na xihín mé ndó. Mé a ndaa ndítahan nu yo caja cáhnu í na cája tátuhun na yóho.

¹⁹ Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihín Priscila chindahá na Ndióxi coo ndó. Ta jári na cúu cuéntá Jesús táca cája cáhnu Ndióxi vehe na cán chindahá na Ndióxi coo ndó.

²⁰ Tóco ndihi na cúu cuéntá Jesús ndúu chóho chindahá na Ndióxi coo ndó. Ta xíní ñúhú cahan Ndióxi xihín táhan ndó ta tatí yúhu táhan ndó ta yii caja ndó ña.

²¹ Yehe cúú Pablo ta xih̄in ndáha mí i cáhyí i ña yóho nu ndó ta chindahá i Ndióxi coo ndó.

²² Ta ndá na cõ quíhvi ini Jesucristo já ná cuhun cháhan jatã ná. Cama chá ná quixi Jesucristo, xitoho í.

²³ Ña cúni quéa ná caja cuaḥa Jesucristo, xitoho í ñamani xih̄in ndo.

²⁴ Quíhvi ini i tóco ndihi ndó jáchi tóco ndihí cúú yó cuéntá Jesucristo, xitoho í. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f